

四庫全書

集部

欽定四庫全書

集部

施註蘇詩續補遺

總目
卷上

詳校官庶吉士_臣李傳熊

檢討_臣何思鈞覆勘

覆校官中書_臣宋 鎔

校對官中書_臣王鍾泰

謄錄監生_臣張 鱗

欽定四庫全書

施註蘇詩續補遺總目

卷上 古體詩一百四十四首

送淡公二首

上韓持國

送別

琴枕

黃州

古風

遊杭州山

遊洞之日有亭吏乞詩既為留三絕句於洞之石

壁明日至峽州吏又至意若未足乃復以此授之

和穆父新涼

無題

古意

用定國韻贈二十姪震 聞潮陽吳子野出家

古離別送蘇伯固

次韻魯直書伯時畫王摩詰

雷州八首

妒佳月

追和沈遼頃贈南華詩 雪林硯屏率魯直同賦

申王畫馬圖

奉和成伯大雨中會客鮮嘲

和公濟飲湖上

贈僧

周教授索枸杞因以詩贈錄呈廣倅蕭大夫

次韻董夷仲茶磨

送公為遊淮南

謝蘇自之惠酒

戲和正甫一字韻

池上二首

贈仲素寺丞致仕歸隱潛山

魯直以詩餽雙井茶次韻為謝

揚州以土物寄少游

贈晏秀

再過泗上二首

贈李兕彥威秀才

次韻謝子高讀淵明傳

龐公

食雉

雙鳧觀

郭綸

初發嘉州

捷為王氏書樓

過宜賓見夷中亂山

夜泊牛口

牛口見月

舟中聽大人彈琴

泊南牛口期任遵聖長官到晚不及見復來

江上看山

留題仙都觀

屈原塔

新灘

新灘阻風

昭君村

黃牛廟

蝦蟆培

留題峽州甘泉寺

寄題清溪寺

荆門惠泉

次韻答荆門張都官維見和惠泉詩

汴陽早發

夜行觀星

漢水

萬山

隆中

竹葉酒

鮑魚

望夫臺

永安宮

八陣磧

諸葛鹽井

潁大夫廟

許州西湖

江上值雪效歐陽體限不以鹽玉鶴鷺絮蝶飛舞
之類為比仍不使皓白潔素等字

渚宮

出峽

神女廟

巫山

觀大水望朝陽巖作

滄洲亭懷古

柏家渡

清遠舟中寄耘老

書堂嶼

戲詠子舟兩竹兩鸚鵡

贈山谷子

鰕魚行

次韻水官詩

弔徐德占

并序

題李伯時淵明東籬圖 李白謫仙詩

數日前夢一僧出二鏡求詩僧以鏡置日中其影

甚異其一如芭蕉其一如蓮花夢中與作詩

飲酒四首

大雪獨留尉氏

阮籍嘯臺

留別叔通元弼坦夫

和寄天選長官

昭陵六馬唐文皇戰馬也琢石象之立昭陵前客

有持此石本示予為賦之

顏闔

贈狄崇班季子

題廬鴻學士堂圖

寄周安孺茶

余自城中還道中雲氣自山
中來如羣馬奔突以手掇開
籠收其中歸家雲盈籠開而
放之作攢雲篇

游山呈通判承議寫寄參寥師

和郭功父韻送芝道人游隱靜

次韻魯直戲贈

寄傲軒

御史臺榆槐竹柏四首

問淵明

朱亥墓

嚴顏碑

峴山

驪山

和子由除日見寄

夢雪

送呂行甫司門倅河陽

觀子玉郎中草聖

竹枝歌

并序

輓轡歌

辨道歌

陳守道

老人行

襄陽樂府三篇

野鷹來
襄陽樂

上堵吟

仙都山鹿

白鶴吟留鍾山覺海

次韻張甥棠美述志

補和陶詩二首

和東方有一士
和劉柴桑

卷下 今體詩二百九十三首

過巴東縣不泊聞頗有萊公遺迹

白帝廟

戎州

和魯人孔周翰題詩二首

獲鬼章二十韻

光祿菴二首

過木樨觀

觀開西湖次吳左丞韻

荊州十首

渝州寄王道祖

過安樂山聞山上木葉有文如道士篆符云此山

乃道陵所寓二首

涪州得山胡

巫山廟上下數十里有烏鳶無數取食於行舟之

上舟人以神之故亦不敢害

夷陵縣歐陽永叔至喜堂

入峽

題贈田辨之琴姬

四十年前元夕與故人從遊得此句

南康望湖亭

半山亭

宋復古畫瀟湘晚景圖三首

海上道人傳以神守氣訣

次周燾韻

過海得子由書

去歲與子野游逍遙堂日欲沒因並西山叩羅浮
道院至已二鼓矣遂宿於西堂今歲索居僖耳
子野復來相見作詩贈之

元祐五年十二月十二日同景文義伯聖途次元
伯固仲蒙游七寶寺題竹上

泗州過倉中劉景文老兄戲贈一絕

戲題巫山縣用杜子美韻

答量以道索書

大老寺竹間閣子

款塞來享

觀臺

吳江岸

嘲子由

無題

扶風天和寺

聞洮西捷報

三萼牡丹

己未十月十五日獄中恭聞太皇太后不豫有赦

作詩

題李景元畫

謝人惠雲巾方爲二首
謝宋漢傑惠李承曼墨

被命南遷塗中寄定武同僚

李妻吹笛

并引

書黃筌畫翎毛花蝶圖二首

次韻王定國得晉卿酒相留夜飲

偶於龍井辨才處得歛硯甚奇作小詩

秋晚客興

陳伯比和回字復次韻

廣陵後園題申公扇子 山光寺回次芝上人韻

與道源遊西莊遇齊道人同往草堂為齊書此

寒食夜

答子勉三首

送楊奉禮

別東武流杯

走筆謝呂行甫惠子魚

贈虔州慈雲寺鑒老

留別登州舉人

過嶺寄子由二首

歇白塔鋪

西蜀楊耆二十年前見之甚貧今見之亦貧所異
於昔者蒼顏華髮耳女無美惡富者妍士無賢
不肖貧者鄙使其逢時遇合豈減當世之士哉
頃宿長安驛舍聞泣者甚怨問之乃昔富而今

貧者乃作一詩今以贈楊君

贈人

觀湖二首

寄高令

寄子由

詩送交代仲達少卿

次韻馬元賓

第五橋

次韻完夫再贈之什某已卜居毗陵與完夫有廬

里之約云

和林子中待制

九日袁公濟有詩次其韻

和吳安持使者迎駕

鹿鳴宴

次韻張甥崇美晝眠

真興寺閣禱雨

惠州近城數小山類蜀道春與進士許毅野步會
意處飲之且醉作詩以記適參寥專使欲歸使
持此以示西湖之上諸友庶使知余未嘗一日
忘湖山也

送蜀僧去塵

曾元恕遊龍山呂穆仲不至

黃河

壬寅重九不預會獨遊普門寺僧閣有懷子由

小飲公瑾舟中

和子由次王鞏韻如囊之句可為一噓

儋耳

答李端叔

立春日病中邀安國仍請率禹功同來僕雖不能
飲當請成伯主會某當杖策倚几於其間觀諸
公醉笑以撥滯悶也二首

和參寥見寄

東園

奉和陳賢良

秋興三首

夜直秘閣呈王敏甫

次韻參寥寄少游

謝曹子方惠新茶

題潭州徐氏春暉亭

贈仲勉子文

講武臺南有感

題寶雞縣斯飛閣

重遊終南子由以詩見寄次韻

次韻和子由欲得驪山沉泥硯

次韻子由彈琴

再次前韻三首

和人回文五首

移合浦郭功甫見寄

送佛面杖與羅浮長老

復官北歸再次前韻

蜀僧明操思歸龍邱子書壁

武昌酌菩薩泉送王子立

答海上翁

占山亭二首

題懷素草帖

雨中明慶賞牡丹

贈僧思誼

子玉以詩見邀同刁丈遊金山

次韻致遠

次韻景文山堂聽第三首

成伯家宴造坐無由輒欲效顰而酒已盡入夜不
欲煩擾戲作小詩求數酌而已

成伯席上贈所出妓川人楊姐

又答羶帳

往年宿瓜步夢中得小詩錄示民師

送范德孺

陸蓮菴

僕年三十九在潤州道上遇除夜作此詩又二十
年在惠州錄之以付過

壽陽岸下

戲答王都尉傳柑

萬州太守高公宿約遊岑公洞而夜雨連明戲贈

二小詩

遊中峰盃泉

憩寂圖

送柳宜歸

寒具

參寥惠楊梅

雨夜宿淨行院

送惠州監押

過黎君郊居

贈王觀

太夫人以无咎生日置酒書壁一絕

余舊在錢塘伯固開西湖今方請越戲謂固可復

來開鏡湖伯固有詩因次韻

邵伯梵行寺山茶

奉和成伯兼戲禹功

病後醉中

夢中絕句

元翰少卿寵惠谷簾水一器龍團二枚仍以新詩
為貺歎味不已次韻奉和

藏春塢三首

謝都事惠米

別公擇

絕句

書寄韻

遊靈隱寺戲贈開軒李居士

常州太平寺蒼菴亭
過文覺顯公房

惠州靈惠院壁間畫一仰面向天醉僧云是蜀僧

隱蠻所作題詩於其下

遊太平寺淨土院觀牡丹中有淡黃一朶特奇為

作小詩

此君軒

觀子美病中作嗟嘆不足因次韻

謁敦詩先生因留一絕

余將赴文登過廣陵而擇老移住石塔相送竹西

亭下留詩為別

絕句三首

呈定國

絕句二首

破琴詩後

送柳子玉至靈山

次韻章子厚飛英留題

贈江州景德長老

雜詩二首

元祐癸酉八月二十七日於建隆章淨館書贈王

觀

聞捷

睡起

秋思寄子由

碣石菴戲贈湛菴主

散郎亭

侯灘

春夜

火星巖

讀開元天寶遺事三首

過泗上喜見張嘉父二首

謝惠貓兒頭笋

題淨因堂

同景文詠蓮塘

睡起

子美召公擇飲偶以病不及往公擇有詩次韻

和參寥

醉題信老方丈

常州太平寺觀牡丹

竹枝詞

寄歐叔弼

題淨因院

絕句

和黃龍清老三省

過土山寨

書辨才白雲堂壁

琴詩

韓康公坐上侍兒求書扇

驪山絕句三首

靈上訪道人相遇

常山贈劉鎡

游三游洞

十一月三日與幾先自竹西來訪慶老不見獨與
君卿供奉蟾知客東閣道話久之惠州追錄

醉睡者

集歸去來詩十首

余歸自道場何山遇大風因憩耘老溪亭命官奴

東燭捧硯寫風竹一枝題詩云

題雲龍草堂石磬

和子由岐下詩并引

北亭
雙池

橫池
荷華

短橋
魚

軒牕
牡丹

曲欄
桃花

李

杏

梨

棗

櫻桃

石榴

檇

槐

松

檜

柳

縱筆

附四言六言

息壤詩

井引

顏樂亭詩

井序

新渠詩

井序

跋姜君弼課冊

數日前夢人示余一卷文字大畧若諭馬者用吃
蹶兩字夢中甚賞之覺而忘其餘戲作數語足
之

憶江南寄純如五首

惠崇蘆雁

何公橋詩

補錄

施註蘇詩續補遺總目

欽定四庫全書

蘇詩續補遺卷上

宋 蘇軾撰

錢塘馮景補註

古體詩一百四十四首

送淡公二首

燕本冰雪骨越淡蓮花風五言雙寶刀聯響高飛鴻翰
光錢舍人詩韻鏗雷公識本不識淡仰詠嗟無窮清韻

東燭捧硯寫風竹一枝題詩云

題雲龍草堂石磬

和子由岐下詩并引

北亭
雙池

橫池
荷華

短橋
魚

軒牕
牡丹

曲欄
桃花

李

石榴

杏
檣

梨
槐

棗
松

櫻桃
檜

柳

縱筆

附四言六言

息壤詩

并引

顏樂亭詩

并序

新渠詩

并序

跋姜君弼課冊

數日前夢人示余一卷文字大畧若諭馬者用吃
蹶兩字夢中甚賞之覺而忘其餘戲作數語足
之

憶江南寄純如五首

惠崇蘆雁

何公橋詩

補錄

施註蘇詩續補遺總目

欽定四庫全書

蘇詩續補遺卷上

宋 蘇軾撰

錢塘馮景補註

古體詩一百四十四首

送淡公二首

燕本冰雪骨越淡蓮花風五言雙寶刀聯響高飛鴻翰
兆錢舍人詩韻鏗雷公識本不識淡仰詠嗟無窮清韻

生物表朗玉傾壺中常於冷竹坐相語道意冲崧洛興
不薄稽江事難同明日若不來我作黃石翁何以兀其
心為君學虛空

本淡二僧名燕越二僧所產地也莊子逍遙遊肌膚
若冰雪傳燈錄慧可頂骨如五峯秀出楞嚴經縱觀
如來青蓮花眼梁昭明文選序退傳有在鄒之作降
將有河梁之篇四言五言區以別矣注降將謂李陵
別蘇武於河梁作五言解頤新語論者謂南風之辭
卿雲之頌夏歌鬱陶乎予心詩體未備五言之濫觴
也建漢李陵始著五言之目唐書秦系曰劉長卿自
謂五言長城系以偏師攻之雖老益壯曹植有寶刀
賦揚雄法言鴻飛冥冥聯響即聯句始於漢武柏梁
宋孝武帝華林都亭曲水聯句效栢梁體長楊賦翰

林以為主人姓譜方雷氏之後蓋古諸侯國黃帝時
有雷公按唐雷威嘗入深松中聽風雪聲連延悠颺
者伐為琴世稱雷公琴世說時人目夏侯太初朗朗
如日月之入懷李安國續唐如玉山之將崩唐詩一
片冰心在玉壺六祖問答九年冷坐無人識神仙傳
浮丘伯姓李隱居嵩山服黃精二十年久之成道白
日飛昇列仙傳王喬周靈王太子晉也好吹笙作鳳
鳴遊伊洛之間遇道士浮丘公接以上嵩山晉書庾
亮曰諸君少住老子於此興復不淺王徽之傳嘗居
山陰夜雪初霽忽憶戴逵逵時在剡便夜乘小船詣
之造門即返漢張良傳老子謂良曰後五日平明與
我期此五日平明良往父已先在怒曰與老人期後
何也去後五日早會又曰孺子見我濟穀城下黃石
即我已遂去不見神仙傳黃石君者修彭祖之術年
數百歲陸機文賦凡若枯木文選注引郭象注曰行
若曳枯木止若聚死灰莊子德克符常季問於仲尼

曰王駘兀者也固有不言之教無形而心成者耶金剛經四維上下虛空可思量不楞嚴經起為世界靜成虛空虛空為同世界為異

坐重青草公意合滄海濱渺渺獨見水悠悠不聞人鏡浪洗手淥剡花入心春雖然防外觸眼前遶衣新行當譯文字慰此吟慙慙

後漢五行志獻帝踐祚之初京師童謠曰千里草何青青十日卜不得生按千里草為董此豈有董姓者與淡公意合耶輿地志鑑湖後魏太守馬臻所開本名慶湖避漢安帝父清河王諱改為鏡湖今在紹興城南述異記鏡湖軒轅鑄鏡於此楞嚴經因色有香因香有觸維摩經會中有一天女以天花散諸菩薩悉皆墮落至大

弟子便著不墮天女曰結習未盡故花著身結習盡者
花不著身又文殊師利歎曰善哉善哉乃至無有文字
語言是真入不二法門高僧傳先是律藏未闡鳩
摩羅什延請多羅誦出十誦梵本羅什譯為晉文

上韓持國

韓氏三虎秉樞極中有一虎似偉節端居隱几學無心
夙駕入朝常正色犯時獨行太嶮巖回天不忘真藥石
輦致歸來荷二聖推排使至有衆力吾儕小人但飽飯
一作食不有君子何能國西湖醉臥春水船如何為人作
豐年

宋史韓維傳字持國與兄絳弟鎮先後同在樞府維屢有
諫諍孔文仲以對策切直罷歸維言臣恐賢俊解體忠良
結舌安石惡之後漢賈彪傳字偉節潁川定陵人彪兄弟
三人並有高名而彪最優故天下稱曰賈氏三虎偉節最
怒漢天文志中宮天樞星其一明者泰一之常居也旁三
星三公又元鳳四年九月客星在紫宮中斗樞極間占曰
為兵春秋運斗樞北斗七星第一曰天樞莊子齊物論南
郭子綦隱几而坐天地篇凡有首有趾無心無耳者衆詩
國風星言夙駕公羊傳孔父正色而立子朝則人莫敢致
難於其君者孔父可謂義形於色矣晉書熊遠字孝文遠
御史中丞中宗每歎其公忠謂遠曰卿在朝正色可謂王
臣後漢書有獨行傳韓文特立而獨行史記相如賦云歲
魄嵬嵬隱隱赫赫唐書貞觀四年詔發卒治洛陽宮且東
幸張玄素上書諫即詔罷役魏徵歎曰張公論事有回天
之力左傳美疢不如惡石戰國策苦言藥也南史王僧孺
傳侍郎金元起欲注素問訪以硤石僧孺答曰古人嘗以

石為針必不用鐵說文有此砭字許慎云以石刺病也東
山經高氏之山多針石郭璞云可以為砭針春秋美疾不
如惡石服子慎注云石砭石也季世無復佳石故以鐵代
之爾晉書董京傳或見推排罵辱曾無怒色王僧虔傳嘗
有書教子曰吾在世雖乏德素要復推排人間十許年故
是一舊物左傳吾儕小人皆有闔廬以避燥濕寒暑又吾
儕小人朝不及夕又不能有君子具能國乎杜甫詩但使殘
年飽喫飯又春水船如天上坐世說世稱庾文康為豐年
玉耕恭為荒年穀庾家論云是文康稱恭為荒年穀庾
長仁為豐年玉又蔡洪曰凡此諸君以義理為豐年

送別

鴨頭春水濃如染水面桃花弄春臉
衰翁送客水邊行
沙櫬馬蹏烏帽點昂頭問客幾時歸
客道秋風落葉飛

繫馬綠楊開口笑傍山依約見斜暉

白居易詩鴨頭新綠水鴈齒小紅橋唐詩桃花笑臉紅
崔護詩人面桃花相映紅通典上古衣毛冒皮則帽之
名所緣起故釋名曰帽者冒也劉熙逸雅帽冒也巾謹
也晉輿服志成帝咸和中制聽尚書八座三省侍郎俱
著烏紗帽陳周弘正謝烏紗帽啟雖復魏宣二端豈能
比今烏紗茲賜廣徽四縫未足擬其華飾漢書司馬遷
報任安書廼欲叩首信眉論列是非莊子盜跖篇
其中開口而笑者一月之中不過四五而已矣

琴枕

清眸作金徽素齒為玉軫響泉竟何用金帶常苦窘
斑漬珠淚宛轉堆雲鬢君若安七絃應彈卓氏引

謝惠連自歲氣之清明雙眸善識文選七發皓齒蛾眉
西京雜記趙后有寶琴曰鳳凰以金玉隱起為龍螭象
嵇康琴賦絃以園客之絲徽以鍾山之玉陳暘樂書琴
論黃帝之清角齊桓之號鐘楚莊之繞梁相如之綠綺
以至玉牀響泉之類名號之別也輟耕錄響泉即蔡邕
所傳開成至寶雷威斷述異記南海之外有數人水居
如魚不廢緝績其眼能泣珠博物志數人賣綃臨去從
主人索器泣而出珠滿盤以謝主人毛詩鬢髮如雲左
傳昔有仍氏女生鬢黑而甚美光可以鑑學記不學操
縵不能安絃彈琴九引一曰烈女引二曰伯妃引三曰
貞女引四曰思歸引五曰霹靂引六曰走馬引七曰笙
篴引八曰秦引九曰楚引漢司馬相如傳臨邛今前奏
琴曰竊聞長卿好之願以自娛相如辭謝為鼓一再行
是時卓王孫有女文君新寡好音故相如謬與令相重
而以琴心挑之

黃州

南山一尺雪雪盡山蒼然澗谷深自暖梅花應已繁使
君厭騎從車馬留山前行歌招野叟共步青林間長松
得高蔭盤石堪醉眠祇樂聽山鳥攜琴寫幽泉愛之欲
忘返但苦世俗牽歸來始覺遠明月高峰顛

春秋隱九年三月庚辰大雨雪左傳平地尺為大雪宋
謝惠連雪賦盈尺則呈瑞於豐年樂府幽澗泉者山水
二十四曲之一李白古樂府拂彼白石彈吾素琴幽澗
漱兮流泉深金徽變化篇段由夫攜琴就松風澗響之
間曰三者皆有自然之聲正合類聚

古風

精神洞元化白日昇高旻俯仰凌倒景龍行逸如神半
道過紫府弭節聊逡巡金牀設寶几璀璨明月珍仙者
二三子眷然骨肉親飲我霞石盃放盃恍如春遂朝玉
虛上冠劍班列真無端拜失儀放弃令自新雲霄難遽
返下土多埃塵淮南守天庖嗟我復何人

莊子在宥篇廣成子曰至道之精窈窕冥冥無視無聽
抱神以靜張紫陽真人曰以精化氣以氣化神以神化
虛名曰三華聚頂淮南子若士曰吾與汗漫期於九垓
之上不可以久駐乃舉臂而竦身遂入雲中神仙傳浮

丘伯隱居嵩山久之道成白日飛昇梁纂要曰景在上曰反景在下曰倒景司馬相如大人賦貫列缺之倒景今涉豐隆之滂濞注倒景氣去地四千里其景皆倒在下也列仙傳陶安公六安治師也七月七日騎赤龍上升几歌夕弭節兮北渚六帖銀宮金闕紫府清都闕令內傳老子與尹喜登崑崙上金臺玉樓七寶宮殿晝夜光明乃天地四王之所遊處有珠玉七寶之狀古樂府金牀王儿不能眠下跼霜與露拾遺記瀛州南有金鸞之觀中有寶几覆以雲紈之素劉孝綽詩共攜雲氣藻同舉霞文杯名山記小有清虛天清虛玉君所居抱朴子河東項曼都入山學仙十年而歸云曾到天上仙人以流霞一杯飲我輒不饒渴忽然思家到上帝前謁拜失儀見斥河東因號曼都為斥仙人又劉安昇仙見上帝誤稱寡人謫守天厨

遊杭州山

山中村塢迷野寺鐘相答晚陰失林莽

一作落

落日猶在

塔行招兩社僧共步青山月送客渡石橋迎客出林樾
幽尋本真性往事聽徐說錢王方壯年此邦事輕俠鄉
人鄙貧賤異類識英傑立石像興王遺址今岌業功勲
三吳定富貴四海甲歸來父老藏崇高畏傾壓詩人工
譏病此欲恣挑抉流傳後世人談笑資口舌是非今已
矣興廢何倉卒持歸問禪翁笑指浮沍沒

五代史吳越世家錢鏐字具美杭州臨安人及壯無賴
販鹽為盜有善術者望斗牛間有王氣見鏐大驚曰貴

人也後起兵并董昌昭宗拜鏐鎮海鎮東軍節度使加檢校太尉中書令鏐游衣錦城宴故老山林皆覆以錦天復二年封鏐越王又梁太祖聞鏐好玉帶名馬笑曰真英雄也又鏐作還鄉歌曰三節還鄉兮挂錦衣父老遠來相追隨牛斗無字人無欺吳越一王駟馬歸吳興記臨安縣東五里石鏡山東有石鏡一所徑二尺四寸光照如鏡武肅王錢鏐幼時遊此照其形服冕旒如王者狀又鏐布衣時嘗照石鏡鏡起而聳戰楞嚴經空生大覺中如海一漚發有漏微塵國皆依空所生漚滅空本無况復諸三有人惟認一浮漚體目為全潮窮盡瀛海汝等即是迷中倍人

遊洞之日有亭吏乞詩既為留三絕句於洞之

石壁明日至峽州吏又至意若未足乃復以此

授之

三絕句老泉及東坡子由各一也按南行集老泉遊三游洞詩云洞中蒼石流成乳

山下寒溪冷欲冰天寒二子苦求去我欲居之亦不能子由詩云昔年有逸客攜手過嵌

岩去我歲已百游人忽復三按此題前東坡有遊三游洞絕句一首今入下卷

一徑遶山翠
縈紆去似蛇
忽驚溪水急
爭看洞門呀
滑磴攀秋蔓
飛橋踏古槎
三扉迎北吹
一穴向西斜
歎息煙雲去
追思歲月遐
唐人昔未到
古俗此為家
洞暖無風雪
山深富鹿豨
相逢衣盡草
環坐髻應墜
竈突依巖黑
樽壘就石窪
洪荒無傳記
想像在犧媧
此事今安有

遺蹤我獨嗟山翁勸留句強為寫槎牙

世說羊元所居山當戶峯巒奇秀謂客曰此翠屏宜晚對爽人心目柳文斗折蛇行明滅可見禮記檀弓魯婦人之髮而弔也自敗于臺始也南宮綰之妻之姑之喪夫子誨之髮柳宗元詩風移魯婦髮淮南子孔子無黔突墨子無暖席魯連子寔五突分烟者衆也吕氏春秋寔突决火上棟字

和穆父新涼

家居妻兒號出仕猿鶴怨未能逐什一安敢搏九萬常恐樗櫟身坐纏冠蓋蔓受恩如負債粗報乃焚券但知眠牛衣寧免刺虎圈清風來既雨新稻香可飯紫螯應

已肥白酒誰能勸君今崔蔡手政比張趙健三公行可
致一語自先獻幸推江湖心適我魚鳥願

韓退之進學解冬暖而兒號寒年豐而妻號飢北山移
文蕙帳空兮夜鶴怨山人去兮曉猿驚漢書楊惲報孫
會宗書糴賤販貴逐什一之利南史宋劉伯龍少而貧
薄及厯位尚書左丞少府武陵太守貧窶尤甚常在家
慨然召左右將營什一之方忽見一鬼在旁撫掌大笑
伯龍歎曰貧窮固有命乃復為鬼所笑也遂止莊子逍
遙遊摶扶搖而上者九萬里又惠子謂莊子曰吾有大
樹人謂之樗其大本擁腫而不中繩墨其小枝卷曲而不
中規矩人閒世匠石之齊至乎曲轅見櫟社樹其大
蔽牛匠伯不顧曰散木也漢書冠蓋相望史記孟嘗君
傳問左右何人可使收債於薛者又馮驩乃持券如前
合之能興息者與為期貧不能興息者取其券而燒之

後漢樊宏傳其素所假貸人間數百萬遺令焚削文契
責家聞者皆慙爭往償之諸子從教竟不肯受漢王章
傳章疾病無被卧牛衣中與妻決涕泣及為京兆欲上
封事妻止之曰人當知足獨不念牛衣中涕泣時耶漢
儒林傳棘同齊人也竇太后好老子書召問固固曰此
家人言耳太后怒曰安得司空城旦書乎乃使固入園
擊毬上假固利兵刺毬正中其心毬應手而倒按此乃
刺毬恐非虎園公蓋偶記張釋之傳虎園嗇夫及郊祀
志商中虎園字耳後漢崔瑗傳瑗字季玉高於文詞尤
善為書記歲銘諸能為文者皆自以為弗及范曄贊崔
為文宗世禪雕龍蔡邕傳邕字伯喈博學好辭章數術
天文妙操音律范曄贊邕實慕靜心精辭綺唐劉宗元
傳雄深雅健似司馬子長崔蔡不足多也漢趙尹韓張
兩王傳班固贊曰自孝武置左馮翊右扶風京兆尹吏
民為之語曰前有趙張後有三王莊子魚相忘於江湖

無題

引手攀紅櫻紅櫻落如線
仰首看紅日紅日走如箭
年光與時景頃刻互衰變
何當血肉身安得常強健
人心苦執迷富貴憂負賤
憂色常在眉歡容不上面
吾今頭半白把鏡非不見
惟應花下盃更待他人勸

論衡曰晝行千里夜行千里李賀詩炎炎紅鏡東方開
圓覺經我今此身四大和合所謂髮毛爪齒皮肉筋骨
皆歸於地唾涕膿血精液涎沫皆歸於水暖氣歸火動
轉歸風楞嚴經豈惟年變亦兼月化何直月化兼又日
遷念念之間不得停住故知我身終成變滅又則知汝
心本妙明淨汝自迷悶喪本受輪南史劉穆之傳謂所

親曰貧賤常思富貴富貴必踐危機今日思為丹徒布衣不可得也又王玄謨傳馳啟孝武具陳本末帝答曰七十老公反欲何求耶復為笑想足以申卿眉頭未曾申故以此為謨性嚴未曾妄笑時人言玄謨眉頭未曾申故以此為戲又齊本紀高帝為相王鎮東府鬱林時五歲狀前戲高帝方令左右拔白髮問曰兒言我誰耶答曰太翁高帝笑謂左右曰豈有為人作曾祖而拔白髮者乎即擲鏡鑷

古意

兒童鞭笞學官府翁憐兒癡旁笑侮翁出坐曹鞭復呵
賢於羣兒能幾何兒曹鞭人以為戲公怒鞭人血流地
等為戲劇誰復先我笑謂翁兒更賢

尚書舜典鞭作官刑朴作教行漢刑法志薄刑用鞭朴唐
開元名例律笞刑五注笞用箠自十至五十贖銅從一斤
至五斤賈誼過秦論執敵朴以鞭笞天下左傳誅屨於徒
人費弗得鞭之見血北史齊本紀流血灑地以為娛樂又
以馬鞭鞭楊愔背流血決袍按自古至今以鞭笞流血
為戲劇者莫高洋若也題曰古意豈亦有感於此耶

用定國韻贈二十姪震

衡門老苔蘚行栢千兵屯開樽邀落日未對烏鳥言清
風舉吹籟散亂書帙翻傳呼一何急人馬從車奔貧居
少賓客鄰婦窺籬簷牆頭過春酒綠泛田家盆比來伏
青蒲坐捉白獸樽王猷修潤色亦有簿領煩朝廷貴二

陸屢聞天語溫猶能整筆陣媿我非韓孫

詩國風衡門之下可以棲遲莊子齊物論子綦曰汝聞人籟而未聞地籟汝聞地籟而未聞天籟夫子游曰敢問其方子綦曰夫大塊噫氣其名爲風杜甫詩隔屋喚西家借問有酒不牆頭過濁醪展席俯長流漢史丹傳候上間獨寢時丹直入臥內頓首伏青蒲上涕泣言曰皇太子以適長立云云天子素仁不忍見丹涕泣言又切至上意大感晉樂志正旦元會設白獸搏於殿廷搏蓋上施白獸若有能獻直言者則發此搏歛之晉書陸機傳字士衡少有異才文章冠世至太康末與雲俱入洛造太常張華華素重其名如舊相識曰伐吳之役利獲二俊王羲之筆陣圖夫絃者陣也筆者刀稍也墨者鑿甲也水硯者城池也心意者將軍也孫何有詩戰篇物華如陣筆如鋒

沈謝曹劉是七雄

聞潮陽吳子野出家

子昔少年日氣蓋里閭俠自言似劇孟叩門知緩急千金已散盡白首空四壁烈士歎暮年老驥悲伏櫪妻孥真弊屣脫棄何足惜四大猶幻座衣冠矧外物一朝發無上願老靈山宅世事子如何禪心久空寂世間出世間此道無兩得故應入枯槁習氣要除拂丈夫生豈易趣舍志匪石當為師子吼佛法無南北

漢書遊俠傳劇孟者洛陽人也周人以商賈為資劇孟以俠顯大類朱家而好博多少年之戲史記袁盎傳緩

急人所有一旦叩門不以親為解不以存亡為辭天下
所望者獨季心劇孟耳司馬相如傳家徒四壁立世說
晉王敦字處仲每酒後輒詠老驥伏櫪志在千里烈士
暮年壯心不已歌闌以如意擊唾壺壺口盡缺史記封
禪書嗟乎誠得如黃帝吾視去妻子如脫屣耳圓覺經
四大假合而成幻軀法華經無上兩足尊楞嚴經反聞
聞自性性成無上道釋典佛國有五精舍其一為靈鷲
山起信論世間根本味禪出世根本淨禪出世口無漏
禪出世間上上禪後漢書遂乃榮華丘壑甘足枯槁楞
嚴經習氣成暴流詩我心匪石漢書司馬遷傳趣舍異
路涅槃經佛說偈言師子一吼衆獸伏金剛一杵羣峯
碎修羅無數一輪降世間黑暗一日破傳燈錄梁武通
天元年達摩來自西土為初祖慧可為二祖僧璨為三
祖道信為四祖弘忍為五祖慧能為六祖自中華五祖
之下曹溪六祖為南宗神秀大師為
北宗又六祖曰人有南北佛性豈然

古離別送蘇伯固

一作送蘇伯固
效韋蘇州

三度別君來此別，真逢暮白盡。
老髭鬚，明日淮南去，酒罷月隨人。
淚濕花如霧，後夜逐君還夢遶湖邊。
一作江南

離騷惟草木之零落兮，恐美人之遲暮。
杜甫詩：老年花似霧中看。

次韻魯直書伯時畫王摩詰

前身陶彭澤，後身常蘇州。
欲覓王右丞，還向五字求。
詩人與畫手，蘭菊芳春秋。
又恐兩皆足，分身來入流。

晉書：陶潛字元亮，為彭澤令。唐韋應物：河南人性高潔，工詩。貞元中，歷蘇州刺史。世稱韋蘇州。唐書：王維字摩

詰官尚書右丞工草隸善畫唐詩品彙總論開元天寶間則孟襄陽之清雅王右丞之精緻大厯貞元間則有韋蘓州之雅澹劉隨州之閒曠烟花錄煬帝曰春蘭秋菊各一時之芳撈嚴經與佛如來同慈力故令我身成三十二應金剛經須陀洹名為入流而實無所入

雷州八首

一統志雷州古粵地天文牛女分野秦屬象郡漢曰徐聞梁隋曰合州曰

海康唐

曰雷州

白髮坐鉤黨南遷瀕海州灌園以餬口身自雜蒼頭籬落秋暑中碧花蔓牽牛誰知把鋤人舊日東陵侯

後漢黨錮傳陳蕃為太傅與大將軍竇武共秉朝政謀誅宦官故引用天下名士乃以李膺為長樂少府及陳

實之敗虜等復廢後張儉事起收捕鉤黨鄉人謂虜曰
可去矣對曰事不辭難舉不逃刑臣之節也吾年已六
十死生有命去將安之乃詣獄考死鄒陽書於陵仲子
解三公為人灌園左傳以餬其口於四方漢鮑宣傳蒼
頭盧兒皆用致富注謂奴為蒼頭猶秦言黔首也史記
召平故秦東陵侯秦滅後為布衣種瓜長安城東瓜美
故世謂之東陵瓜又云青門瓜青門
東陵也杜甫詩縱有健婦把鋤犁

荔子無幾何黃柑遽如許遷臣不惜日恣意移寒暑層
巢俯雲木信美非吾土草芳自有時鶻鴂何關汝

廣志荔支樹青花朱實大如鷄子實白如肪甘而多汁
似安石榴有甜酸者至日將中翕然俱赤則可食也一
樹下子有百斛風土記甘橘之屬滋味甜美有黃者頗
者謂之胡甘後漢方術傳左慈走入羊羣操知不可得

乃令就羊中告之曰不復相殺本試君術耳忽有一老
羝屈前兩膝人立而言曰遽如許即競往赴之而羣羊
數百皆變為羝並屈前膝人立云遽如許王粲登樓賦
雖信美而非吾土兮曾何足以少留離騷經恐鶉鴒之
先鳴兮使百草為之不芳

下居近流水小巢依嶺岑終日數椽間但聞鳥遺音爐
香入幽夢海月明孤斟鷓鴣一枝足所恨非故林

莊子逍遙遊鷓鴣巢
於深林不過一枝

培塿無松栢駕言此馬游讀書與意會卻掃可忘憂尺
蠖以時屈其伸亦非求得歸良不惡未歸且淹留

左傳部婁無松栢墨子培塿生松栢說文培塿小山也
詩國風駕言出遊後漢杜密傳劉勝自蜀郡告歸鄉里
閉門掃軌無所干及又劉祐杜門絕迹周易尺蠖之屈
以求信也劉安招隱士攀援桂枝兮聊淹留又心淹留
兮洞荒忽

粵嶺風俗殊有疾時勿藥東帶趨房祀用史巫紛若絃
歌薦齒栗奴至洽觴酌呻吟殊未央更把鷄骨灼

周易无妄之疾勿藥有喜又巽在牀下用史巫紛若陳
氏禮書其牲角繭栗漢書郊祀志粵人勇之乃言粵人
俗鬼而其祠皆見鬼數有効廼命粵巫立粵祀祠安臺
無壇亦祠天神帝百鬼而以鷄卜自此始用師古註俗
鬼言其土俗尚鬼神之事

粵女市無常所至輒成區一日三四遷處處售鰕魚青
帚腳不襪臭味猥與狙孰云風土惡白洲生綠珠

漢揚雄傳有田一壥有宅一區廣志鰕魚類土附而腮
紅若虎善食蝦俗謂之新婦魚一名鰕虎方輿記博白
雙角山下梁氏女綠珠生此石崇為採訪使以珠三斛
易之舊井尚存汲飲者產女必麗色千寶晉記石崇有
妓人曰綠珠

海康臘已酉不論冬孟仲殺牛撾鼓祭城郭為傾動雖
非禋頌歷自我先人用苦笑荆楚人嘉平臘雲夢

風俗通夏曰嘉平殷曰清祀周曰大蜡漢改曰臘臘者
獵也因獵取禽獸以祭先祖也荆楚歲時記諺云臘鼓

鳴春草生村人並擊細腰鼓戴胡頭以逐疫搜神記宣
帝時陰子方臘日晨炊竈神見子方以黃羊祀之後遂
鉅富故後人臘日記竈後漢陳咸傳成哀間為尚書王
莽篡位謝病不仕猶用漢家祖臘曰我先人宜知王氏
乎臘

舊時日南郡野女出成羣比去尚應遠東風已如雲蚩
氓託絲布相就通慇懃可憐秋胡子不遇卓文君

後漢郡國志曰南郡注秦象郡武帝更名屬交州刺史
所部劉熙逸雅郡羣也人所羣聚也詩國風有女如雲
又氓之蚩蚩抱布貿絲列女傳魯秋胡潔婦者魯秋胡
之妻也秋胡子既納之五日而去宦於陳五年乃歸未
至家見採桑婦美謂曰力田不如逢少年力桑不如見
公卿今吾有金願與夫人婦不受秋胡子還家奉金遺

母母使人呼其婦即採桑者婦乃自投於河而死

妬佳月

狂雲妬佳月怒飛千里黑佳月了不嗔曾何汙潔白爰
有謫仙人舉酒為三客今夕偶不見汎瀾念風伯毋煩
風伯來彼也易滅沒支頤少待之寒空淨無迹粲粲黃
金盤獨照一天碧玉繩慘無輝玉露洗秋色浩瀚玻瓈
琰和光入胸臆使我能永延約君為莫逆

莊子怒而飛其翼若垂天之雲鮑照詩三五二八時千
里與君同李白詩對月成三人韓非子黃帝合鬼神於

泰山風伯進掃雲笈七籤風伯姓方名道彰呂氏春秋
風伯曰飛廉莊子漁父左手據膝右手持頤以聽世說
司馬太傅齋中夜坐於時天月明淨都無纖翳太傅歎
以為佳謝景重在坐答曰意謂乃不如微雲點綴太傅
曰卿居心不淨乃復強欲滓穢太清耶杜詩月落如金
盆禮斗成儀玉衡北兩星為玉繩謝朓詩金波麗瑤鸞
玉繩低建章五經通義和氣精液凝為露杜詩玉露凋
傷楓樹林李白詩秋露如白玉團圓下庭綠莊子大宗
師三人相視而笑莫
逆於心遂相與友

追和沈遼頃贈南華詩

善哉彼上人了知明鏡臺
歡然不我厭肯致遠公材
莞爾無心雲胡為出岫來
一堂安寂滅卒歲扃蒼苔

禪宗要覽瓶沙王呼佛弟子為上人內有德智外有勝
行在人之上故名上人傳燈錄神秀偈曰身是菩提樹
心如明鏡臺時時勤拂拭莫使惹塵埃盧慧能曰美則
美矣了則未了和一偈曰菩提本無樹明鏡亦非臺本
來無一物何處惹塵埃陶淵明歸去來辭雲無心以出
岫高僧傳晉義熙間僧惠遠居廬山與劉遺民等十八
賢同修淨土中有白蓮池因號蓮社隋書
經籍志涅槃譯言滅度亦言常樂我淨

雪林硯屏率魯直同賦

西山無時春巉巖鎖頑陰分明倚天壁點綴無風林物
固為人出興誰於此深窮竒真自蠹詩句且娛心

世說微雲點綴及老子於此興復不淺
皆註見前史記李斯傳娛心意說耳目

中王畫馬圖

天寶諸王愛名馬千金爭致華軒下當時不獨玉花驄
飛電流雲絕瀟灑兩坊岐薛寧與申憑陵內廐多清新
肉駿汗血畫龍種紫袍玉帶真天人驪山射獵包原隰
御前急詔穿圍入揚鞭一蹶破霜蹏萬騎如風不能及
鴈飛兔走驚弦開翠華按轡從天回五家錦繡變一作遍

山谷百里烏珥遺纖埃青驪蜀棧兩超忽一作西高準

濃娥散荆棘回首追風趁日飛一作首莊連五陵佳氣

一作首莊連
天鳥自飛

春蕭瑟

杜詩朝來少試華軒下盡斷唐玄宗所乘馬有玉花驄照
夜白唐書宗室世系惠文太子範嗣岐王珍惠宣太子業
嗣薛王知柔杜詩內駿銀礪連錢動西域傳大宛國別邑
七十餘城多善馬馬汗血言其先天馬子也杜詩霜蹄千
里駿入汝陽真人古今注秦始皇有七名馬一追風二
白兔三躡景四追電五飛翺六銅爵七晨晷八瑞應九飛兔
神馬名日行三萬里顏延之馬賦紫燕駢銜按鴈飛兔走
皆指馬言則爲當作燕唐書后妃傳每十月帝幸華清宮
五宅車騎皆從家別爲隊隊一色俄五家隊合爛若萬花
川谷成錦繡又遺細圍馬瑟瑟殘琲狼藉於道香聞數十
里原註明皇乘青驪入蜀後漢書蘇伯阿望春陵
城曰氣佳哉鬱鬱蔥蔥杜詩五陵佳氣無時無

奉和成伯大雨中會客解嘲

樂事難并真實語坐排用意多乖誤興來取次或成懽
瓦鉤卻勝黃金注我生禍患久不擇肯為一時風雨阻
天公變化豈有常明月行看照歸路

王勃滕王閣序四美具二難并金剛經如來是真語者
實語者李義山詩若信貝多真實語三生同聽一樓鐘
莊子達生以瓦注者巧以鉤注者憚以黃金注者殫其
巧一也而有所矜則重外也凡外重者內拙西陽雜俎
天公姓張名堅漁陽人乘白龍振策登天

和公濟飲湖上

昨夜醉歸還獨寢曉來宿雨鳴孤枕扁舟小棹截湖來

正見青山駿雲錦須知老人興不淺莫學公榮不共飲
與君歌鼓樂豐年喚收千夫食陳廩

詩小雅厭厭夜飲不醉無歸世說劉公榮與人飲酒雜
穢非類人或譏之答曰勝公榮者不可不與飲不如公
榮者亦不可不與飲是公榮輩者又不可不與飲故終
日共飲而醉又王戎弱冠詣阮籍劉公榮在坐阮謂王
曰偶有二斗美酒當與君共飲彼公榮者無預焉或問
之阮答曰勝公榮者不得不與飲酒不如公榮者不可
不與飲酒惟公榮可不與飲
酒按詩云不共飲蓋主後說

贈僧

道人自嫌三世將棄家十年今始壯玉骨猶含富貴餘

漆瞳已照人天上去年相見古長干
衆中矯矯如翔鸞
今年過我江西寺病瘦已作霜松寒
朱顏不辦供歲月
風中蒿火湯中雪好問君家黃面翁
乞得摩尼照生滅
莫學王郎與支遁臂鷹走馬憐神駿
還君圖畫君自收
不如木人騎土牛

史記王翦傳為將三世者必敗其所殺伐多矣其後受
其不祥今王離已三世將矣居亡何頃羽救趙擊秦軍
果虜王離廣信哀江南賦三世為將終於此滅江左名
士傳杜弘治目如點漆一統志金陵長干里在聚寶門
外有長干橋世說支道林長養數匹馬或言道人畜馬
不韻支曰貧道重其神駿善信經明月珠摩尼珠多在

龍腦中杜詩惟有摩尼珠可照濁水源舊注周泰權新城太守司馬宣王使鍾繇調之曰君釋褐登宰府三十六日而擁麾蓋守兵馬郡乞兒乘小車一何駛乎泰曰君明公之子有文采守吏職獼猴騎木牛又何遲也李白詩身騎土牛帶東魯

周教授索枸杞因以詩贈錄呈廣倅蕭大夫

鄴侯藏書手不觸嗟我嗜書終日讀短檠照字細如毛
怪底昏花懸兩目扶衰賴有王母杖名字於今挂仙錄
荒城古塹草露寒碧葉叢低紅菽粟春根夏苗秋著子
盡付天隨恥充腹蘭傷桂折緣有用爾獨何損丹其族

贈君慎勿比薏苡採之終日不盈掬外澤中乾非爾儔
斂藏更借秋陽曝鷄壅桔梗一稱帝堇也雖尊等臣僕
時復論功不汝遺異時謹事東籬菊

韓退之詩鄴侯家多書架插三萬軸一一懸牙籤新若
手未觸又短檠二尺便且光楞嚴經澄以發勞則於虛
空別見狂華唐書陸龜蒙字魯望居松江甫里時謂江
湖散人或號天隨子所居前後皆樹杞菊以供杯案揚
雄解嘲客徒欲朱丹吾數不知一跌將赤吾之族也後
漢馬援傳初援在交趾嘗餌薏苡實以勝瘴氣軍還載
之一車詩小雅終朝採芣不盈一掬莊子徐無鬼藥也
其實莖也桔梗也鷄臠也豕零也是時為帝者也何可
言勝

次韻董夷仲茶磨

前人初用茗飲時煮之無問葉與骨寢窮厥味白始用
復計其初碾方出計盡功極至於磨信哉知者能創物
破槽折杵向牆角亦其遭遇有伸屈歲久請求知處所
佳者出自衡山窟巴蜀石工強鑄鑿理疎性軟良可咀
予家江陵遠莫致塵土何人為披拂

茶經其名一曰茶二曰檟三曰蔎四曰茗五曰薺郭璞
云早取為茶晚取為茗天台記丹邱出大茗服之生羽
翼茶譜歷代貢茶皆以建寧為上而密雲龍品最高皆
碾末作餅周禮考工記知者創物巧者述之守之世謂

之工

送公為遊淮南

負米萬里緣其親運甓無度憂其身讀書莫學流麥士
挾策莫比亡羊人廼翁辛苦到白首汝今強勉當青春
昔時管鮑以君霸此兩士賈寧非負

家語子路曰昔由事二親之時常食藜藿之食為親負
米百里之外親沒之後南遊於楚從車百乘積粟萬鍾
累茵而坐列鼎而食顧欲食藜藿為親負米不可得也
晉陶侃傳侃在州無事輒朝運百甓於齋外暮運於齋
內人問其故答曰吾方致力中原過爾優逸恐不堪事
其勵志勤力皆此類也後漢高鳳傳字文通南陽葉人

也少為書生家以農畝為業而專精誦讀妻嘗之田曝
步於庭令鳳護鷄時天暴雨而鳳持竿誦經不覺潦水
流步妻還怪問鳳方悟之其後遂為名儒莊子駢拇篇
臧與穀二人相與牧羊而俱亡其羊問臧奚事則扶笑
讀書問穀奚事則博塞以遊二人所業不同其亡羊均
也史記管仲曰吾始困時嘗與鮑叔賈分財利多自與
鮑叔不以我為
貧知我貧也

謝蘇自之惠酒

高士例須憐麴蘖此語常聞退之說我今有說殆不然
麴蘖未必高士憐醉者墜車莊生言金酒未若金於天
遠人本自不虧缺何暇更求全處全景山沈速阮籍傲

畢卓盜竊劉伶顛貪狂嗜怪無足取世俗喜異矜其賢
杜陵詩客尤可笑羅列八子參羣仙流涎露頂置不說
為問底處能逃禪我今不飲非不飲心月皎皎長孤圓
有時客至亦為酌琴雖未去聊忘絃吾宗先生有深意
百里雙罌遠將寄且言不飲固亦高舉世皆同吾獨異
不如同異兩俱冥得鹿亡羊等嬉戲決須飲此勿復辭
何用區區較醒醉

韓退之贈崔立之詩高士例須憐魏蘗莊子達生夫醉
者之墜車雖疾不死骨節與人同而犯害與人異其神

全也又彼得全於酒而猶若是而況得全於天乎三國志徐邈字景山為尚書郎時科禁酒而邈私飲至於沈醉晉書阮籍傳字嗣宗籍傲然獨得任性不羈嗜酒能嘯畢卓傳字茂世太興末為吏部郎常飲酒廢職比舍郎釀熟卓因醉夜至其甕間盜飲之為掌酒者所縛劉伶傳字伯倫常乘鹿車攜一壺酒使人荷鍤而隨之謂曰死便埋我其遺形骸如此杜甫飲中八仙歌道逢提車口流涎又脫帽露頂王公前又醉中往往愛逃禪傳燈錄心月孤圓光吞萬象音陶潛傳性不解音而畜素琴一張絃徽不具每朋酒之會則撫而扣之曰但識琴中趣何勞絃上聲列子鄭人擊鼓麀斃之覆之以蕉蔽而遺其所藏之處遂以為夢馬順逐誅其事傍人聞而取之告其室人曰向薪者夢得鹿而不知其處吾今得之彼直真夢者矣亡羊注已見楚辭衆人皆醉我獨醒

戲和正甫一字韻

一字韻
未詳

故居劍閣隔錦官柑果薑蕨交荆菅奇孤甘挂汲古綆
僥覲敢揭鉤金竿已歸耕稼供藁秸公貴幹蠱高中冠

改更句格各蹇

當作

吃姑因狡獪加間闕

劍閣記梁山之險蜀所恃以為外戶大劍山與小劍山
相屬秦欲伐蜀而道不通廼造五石牛以金置尾下言
能糞金將以遺蜀蜀主負力而貪令五丁開道引入之
秦因架閣為棧道司馬錯由此伐蜀蜀志錦官城萬里
橋南一名錦里韓詩汲古得修綆世說頭責秦子羽云
此數子者或蹇吃無官商管子行年六十而老吃史記
韓非為人口吃不能道說而善著書神仙傳王方平
謂麻姑云姑回少年吾老矣不復作此狡獪變化也

池上二首

小池新鑿會天雨一部鼓吹從何來有蟾正碧亂草色
時汨出沒東南隈井幹跳梁亦足樂洞庭魚龍何有哉
能歌德聲莫入月清池與爾俱忘回

南齊書孔稚珪字德璋風韻清疎不樂世務門庭之內
草萊不翦南有山池春日蛙鳴或問之曰欲為陳蕃乎
稚珪笑曰我以此當兩部鼓吹莊子秋水子獨不聞夫
涸井之龜乎謂東海之鼈曰吾樂與吾跳梁之井幹之
上張衡靈憲昇請不死之藥於西王母嫦娥竊之以奔
月將往枚筮之於有黃有黃占之曰吉翩翩歸妹獨將
西行逢天晦芒母驚母恐後且大
昌嫦娥遂託身於月是為蟾蜍

不作太白夢日邊還同樂天賦池上池上新年有荷葉

細雨魚兒噉輕浪
男兒學易不應舉
幽人一友吾得尚
此池便可當長江
欲榜茅齋來蕩漾

李太白詩間來垂釣碧溪上忽復乘舟夢日邊白居易池上篇十畝之宅五畝之園有水一池有竹千竿有叟

在中白須飄然云云

贈仲素寺丞致仕歸隱潛山

一統志皖山在潛山一名皖公山皖

伯始封地按潛山在今安慶

潛山隱君

一作居

七十四紺瞳綠髮方謝事
腹中靈液變

丹砂江上幽居連福地
彭城為我駐三日
明月滿舟

一作

船同一醉丹書細字口傳訣顧我沉迷真棄耳年來四

十髮蒼蒼始欲求方救憔悴他年若訪潛山居慎勿逃

人改名字

寰宇記潛山在潛山縣一名皖伯臺左慈常修煉於此
上有二崑三峯四洞太清煉靈丹經丹砂外包八石內
含金精八素經司命著籍玉簡丹書編以金縷纏以素
絲韓文吾年未四十而視茫茫而髮蒼蒼莊子讓王篇
魯君聞顏闔賢往聘之闔鑿坏以遁永嘉郡記張薦隱
居願志家有苦竹數十頃薦為屋居其中王右軍聞而
造之薦逃避竹中不與相見
後漢書孔嵩變名姓為傭

魯直以詩餽雙井茶次韻為謝

江夏無雙種奇茗汝陰六一誇新書磨成不敢付僮僕

自看雪湯生幾珠列仙之儒瘠不腴只有病渴同相如

明年我欲東南去畫舫何妨宿太湖

公自注歸田錄草茶以雙井為第一

畫舫宿太湖北

清貢茶故事

後漢書文苑傳黃香字文強江夏安陸人京師號曰天下無雙江夏黃童史記相如以為列仙之儒居山澤間形容甚臞此非帝王之倦意也乃遂就大人賦人相如口吃而善著書常有消渴疾

揚州以土物寄少游

鮮鯽經年秘醺醑團臍紫蟹脂填腹後春蓴茁活如酥

先社薑芽肥勝肉鳥子纍纍何足道點綴盤餐亦時欲
淮南風俗事瓶罌方法相傳竟留蓄且同千里寄鵝毛
何用孜孜飲麋鹿

本草鯽魚一名鮒魚形亦似鯉色黑而體促腹大而脊
隆所在池沼皆有之孟先本草鯽是稷米所化其魚腹
上猶有米色埋性此魚旅行吹沫如星以其相即故謂
之鯽以其相附故謂之鮒荆州記淥水出豫章康樂縣
其間為程鄉有酒官取水為酒極甘美與湘東鄣湖酒
年常獻之世稱鄣淥酒左思吳都賦飛輕觴而酌醴淥
邪陽酒賦其品類則沙洛淥鄣為程下若齊公之清闕
中白薄傳脈蟹譜生於濟鄣者其色紺紫產於江刺者
其色青白皮日休詩蟹因霜重金膏溢橘為風多玉腦
圖南方草木狀蓴生水中葉似鳬葵浮水上花黃白子

紫色三月至八月莖細如釵股名為絲蓴堪噉味甘寒
杜甫詩金城土酥淨如練又理生那免俗方法報山妻

贈曇秀

白雲出山初無心棲鳥何必戀山林道人偶愛山水故
縱步不知湖嶺深空巖已禮百千相曹溪更欲瞻遺像
要知水味孰冷暖始信夢時非幻妄袖中忽出貝葉書
中有壁月綴星珠人間勝絕畧已遍匡廬南嶺并西湖
西湖北望三十里大堤冉冉橫秋水誦師佳句說南屏
瘴雲應逐秋風靡胡為只作十日歡杖策復尋歸路難

留師筍蕨不足道悵望荔子何時丹

歸去來辭雲無心以出岫傳燈錄曹溪在韶州府城東南梁時有天竺國僧自西來汎舶曹溪口聞異香曰上流必有勝地尋之遂開山立石乃云百七十年當遇無上法師在此演法今六祖慧能南華寺是也佛書如人飲水冷暖自知金剛經一切有為法如夢幻泡影釋典佛經出自西域以貝葉書之流入中國漢志五星連珠日月合璧緯文

荔子丹兮蕉黃

再過泗上二首

眼明初見淮南樹十客相逢九吳語旅程已付夜帆風
客睡不妨背船雨黃柑紫蟹見江梅紅藕白魚飽兒女

慙慙買酒謝船師千里勞君勤轉櫓

杜詩白小羣分命天然二寸魚又溪女得錢畱白魚

繫舟淮北雨折軸繫舟淮南風斷橋客行有期日月疾
歲事欲晚霜雪驕山根浪頭作雷吼縮手敢試舟師篙
不用燃犀照幽怪要須拔劍斬長蛟

史記犀兕折軸韓文巧匠旁觀縮手就閒晉書溫嶠還武昌至牛渚磯水深不可測嶠燃犀角照之見水族奇形異狀夢曰幽明道別何相照也水經注滄臺子羽齋千金之璧渡河陽侯波起兩蛟夾舟子羽曰吾可以義求不可以威劫操劍斬蛟晉書周處傳投水搏蛟蛟或沈或浮行數十里而處與之俱三日三夜殺蛟而反呂

氏春秋別有飲飛者涉江至於中流而兩蛟夾繞其船以飛拔寶劍刺蛟殺之

贈李兕彥威秀才

魏王大瓠實五石種成落將安適可憐公子持十牛
海上三年竟何得先生少負不羈才從軍數到單于臺
天山直欲三箭取白衣將軍何人哉夜逢怪石曾飲羽
戲中戟枝何足數誓將馬革裹尸還肯學班超苦兒女
封侯衛霍知幾許老矣先生困羈旅酒酣聊復說平生
結襪猶堪一再鼓棄書捐劍學萬人紈袴儒冠皆誤身

窮途政似不龜手與世羞為西子顰如今惟有談天口

雲夢胸中吞八九世間萬事寄黃梁且與先生說烏有

莊子逍遙遊魏王貽我大瓠之種我樹之成而實五石以盛水漿其堅不能自舉也剖之以為瓢則瓠落無所容外物篇任公子為大釣巨緇五十犗以為餌蹲乎會稽投竿東海旦旦而釣期年不得魚漢司馬遷傳僕少負不羈之才長無鄉曲之譽唐書將軍三箭定天山壯士長歌入漢闕韓詩外傳楚熊渠子夜行見寢石以為伏虎也彎弓射之沒金飲羽史記李廣傳廣出獵見草中石以為虎而射之中石沒鏃視之石也因復更射之不入矣後漢呂布傳植戰於營門布彎弓顧曰諸君觀布射戰小支中者當各解兵不中可留決闕布即一發正中戰支馬援傳丈夫當以馬革裹尸還葬幸矣史記張釋之傳王生老人曰吾戰解顧謂張廷尉為我結讎

釋之跪而結之相如傳為鼓一再行漢書項籍傳籍少時
學書不成去學劍又不成去梁怒之籍曰書足記姓名
而已劍一人敵不足學學萬人敵杜詩統袴不餓死儒
冠多誤身莊子逍遙遊宋人有善為不龜手之藥者世
世以泝泝統為事客聞之請買其方百金天運篇西施
病心而顰其里其里之醜人見而美之歸亦捧心而顰
其里史記騶衍之術迂大而閎辯爽也文具難施淳于
髡久與處時有得善言故齊人頌曰談天行雕龍奭災
數過髡司馬相如傳相如以子虛虛言也為楚稱烏有
先生者烏有此事也為齊難無是公者無是人也明天
子之義又吞若雲夢者八九其於胷中曾不蒂芥呂純
陽集洞濱隨雲房同憩一肆中雲房自起執炊洞賓入
夢備極富貴寵榮為相數十年忽被罪譴籍沒家資分
散妻孥路值風雪僕馬俱瘁一身無聊方興浩歎恍然
夢覺雲房炊黃粱尚未熟也雲房笑曰子適來
之夢升沈萬態榮悴多端五十年間一頃耳

次韻謝子高讀淵明傳

枯木嵌空微黯淡，古器雖在無古絃。
袖中正有南風手，誰為聽之誰為傳。
風流豈落正始後，甲子不數義熙前。
一山黃菊平生事，無酒令人意缺然。

晉陶潛畜素琴一張，絃徽不具，詳見前家語。舜彈五絃之琴，歌南風之詩，史記誰為為之，孰令聽之。世說王敦為大將軍，鎮豫章，衛玠避亂從洛，投敦，相見欣然談話，彌日。於時謝鯤為長史，敦謂鯤曰：「不意永嘉之中復聞正始之音。」阿平若在，當復絕倒。南史：「隱逸傳：陶潛所著文章皆題其年月，義熙以前，明書晉氏年號，自永初以末，惟云甲子而已。」

龐公

襄陽龐公少檢束白髮不髡亦不俗世所奔趨我獨棄
我已有餘彼不足鹿門有月樹下行虎溪無風舟上宿
不識當時捕魚客但愛長康畫金粟杜口如今不復言
龐公為人不曲局東西有人問老翁為道明燈照華屋
五言七言正兒戲三行五行亦偶爾我性不飲只解醉
正如春風弄羣卉四十年來同幻事老去何須別愚智
古人不仕亦不滅我今不作亦不止寄語悠悠世上人

浪生浪死一埃塵洗墨無池筆無象聊爾作戲悅吾神

後漢逸民傳龐公者南郡襄陽人也居峴山之南未嘗入城府夫妻相敬如賓後遂攜其妻子登鹿門山因採藥不反桃花源記武陵人以捕魚為業名畫記顧愷之字長康於瓦棺寺北殿內畫維摩居士畫畢光耀月餘杜詩虎頭金粟影神妙獨難忘唯識論生相謂本無今有住相謂生位暫停異相謂住別前後滅相謂暫有還無圓覺經云何四疾一者作病二者任病三者止病四者滅病佛經流浪生死豫章志臨川墨池王羲之學書處至今池水盡黑一在金谿白水寺乃謝靈運滁研處也

食雉

雄雉曳修尾驚飛向日斜空中紛格鬬綵羽落如花喧

呼勇不顧投網復誰嗟百錢得一雙新味時所佳烹煎
雜鷄鶩爪距漫搓牙誰知化為蜃海上落飛鵝

禽經雉介鳥也以其善搏鬪也詩王風
雉離于羅月令孟冬雉入大水為蜃

雙鳬觀

在葉縣

王喬古仙子時出觀人寰常為漢郎吏厭世去無還雙
鳬偶為戲聊以驚世頑不然神仙迹羅網安能攀紛紛
塵埃中銅印紆青綸安知無隱者竊笑彼愚姦

後漢王喬傳顯宗世為葉令喬有神術每月朔望常自
縣詣臺朝帝怪其來數而不見車騎密令太史伺望之

言其臨至輒有雙鳬從東南飛來於是侯鳬至舉羅張之但得一隻鳬焉乃詔上方詠視則四年中所賜尚書官屬履也人或曰此即古仙人王子喬也

郭綸

稅

公自注綸本河西弓箭手屢戰有功不賞自黎州都監官滿貧不能歸今權嘉州監

河西猛士無人識日暮津亭閱過船
路人但覺驄馬瘦不知鐵槊大如椽
因言西方久不戰截髮願作萬騎先
我當憑軾與寓目看君飛矢射蠻羶

大風歌安得猛士兮守四方後漢書行行且止避驄馬御史左傳楚子玉請戰曰請與君之士戲君憑軾而觀

之得臣與
寓目焉

初發嘉州

漢屬犍為郡曰漢嘉隋曰眉山唐宋曰嘉州按眉州唐曰嘉州此是今之

嘉定州非眉州也原註嘉祐己亥冬先生與子由侍老泉舟行適楚

朝發鼓闐闐西風獵畫旂故鄉飄已遠往意浩無邊錦

水細不見蠻江清更鮮奔騰過佛腳曠蕩造平川野市

有禪客釣臺尋暮烟相期定先到久立水潺潺

公自注是日期

鄉僧宗一會
別釣魚臺下

詩小雅伐鼓淵淵振旅闐闐注闐闐亦鼓聲也杜詩秦川對酒平如掌舊注錦水岷江也蠻江陽山與青衣江

也三江合流於嘉州城東南過
九頂山凌雲寺大像閣而下

健為王氏書樓

樹林幽翠滿山谷樓觀突兀起江濱云是昔人藏書處
磊落萬卷今生塵江邊日出紅霧散綺窓畫閣青氛氤
山猿悲嘯谷泉響野鳥嘒巖花春借問主人今何在
被甲遠戍長苦辛先登搏戰事斬級區區何者為三墳
書生古亦有戰陣葛巾羽扇揮三軍古人不見悲世俗
回首蒼山空白雲

爾雅狹而修曲曰樓說文樓重屋櫟爾雅觀謂之闕釋
名觀者於上觀望也墨客揮犀杜學士鎬博聞強記凡
有檢閱取視無差士大夫有所撰著咨以古事無不知
者號為杜萬卷左傳穎考叔取鄭伯之旗螯弘以先登
又是能讀三墳五典八索九丘世語諸葛武侯獨乘素輿葛巾毛扇指麾三軍

過宜賓見夷中亂山

一統志宜賓在叙州漢焚道後周外江唐義賓宋宜

賓原註嘉

祐四年作

江寒晴不知遠見山上日朦朧含高峰晃蕩射峭壁橫
雲忽飄散翠樹紛歷歷行人挹孤光飛鳥投遠碧蠻荒
誰復愛穠秀安可適豈無避世士高隱鍊精魄誰能從

之遊路有豺虎迹

後漢書避世牆東王君公黃氣陽精經金門日之通門
也其內有金精冶鍊之地故立春之節日更鍊魄於金
內之

夜泊牛口

日落江霧生繫舟宿牛口居民偶相聚三四依古柳負
薪出深谷見客喜且售煮蔬為夜殮安識肉與酒朔風
吹茅屋破壁見星斗兒女自咿嚶亦足樂且久人生本
無事苦為世味誘富貴耀吾前貧賤獨難守誰知深山

子甘與麋鹿友置身落蠻荒生意不自陋今予獨何者
汲汲強奔走

高士傳披裘公曰五月披裘而負
薪豈取遺金者哉詩深谷為陵

牛口見月

原注時嘉祐元年始舉進士至京師
作按詩意當是己亥適楚至牛口作

也

掩牕寂已睡月腳垂孤光披衣起周覽飛露洒我裳山
川同一色浩若涉大荒幽懷耿不寐四顧獨彷徨忽憶
丙申年京邑大雨霧蔡河中夜決橫浸國南方車馬無

復見紛紛操棧郎新秋忽已晴九陌尚汪洋龍津觀夜市燈火亦煌煌新月皎如畫疎星弄寒芒不知京國喧謂是江湖鄉今來牛口渚見月重淒涼卻思舊遊處滿陌沙塵黃

詩國風耿耿不寐如有隱憂莊子養生主為之四顧

舟中聽大人彈琴

彈琴江浦夜漏永斂衽竊聽獨激昂風松瀑布已清絕更愛玉珮聲琅璫自從鄭衛亂雅樂古器殘缺世已忘

千年寥落獨琴在有如老仙不死閱興亡世人不吝獨
反古強以新曲求鏗鏘微音淡弄忽變轉數聲浮脆如
笙簧無情枯木今尚爾何況古意墮渺茫江空月出人
響絕夜闌更請彈文王

琴錄吳忠懿王得天台寺中對瀑布泉屋柱斲二琴一
號洗凡一號清絕為曠代之寶李白琴贊嶧陽孤桐石
聳天骨根老水泉葉苦霜月斲為綠綺廠聲榮發秋風
入松萬古奇絕古今樂錄天寶十三載始詔道調法曲
與胡部新聲合作自爾夷夏之聲相亂無復辨者拾遺
記師涓造新曲以代古樂街靈公情涵心感急於政事
史記孔子世家孔子學鼓琴師襄子十日不進曰得其
為人黯然而黑頎然而長眼如望羊心如王四國非文

王其誰能為此也師襄子辟
席拜曰師蓋云文王操也

泊南牛口期任遵聖長官到晚不及見復來

江上有微徑深榛煙雨埋崎嶇欲取別不見又重來下
馬未及語固已慰長懷江湖涉浩渺安得與之偕

韋應物詩一郡荆榛煙雨中陶潛歸去
來辭既窈窕以窮壑亦崎嶇而經丘

江上看山

船上看山如走馬歛忽過去數百羣前山槎牙忽變態
後嶺雜還如驚奔仰看微逕斜繚繞上有行人高縹緲

舟中舉手欲與言孤帆南去如飛鳥

詩大雅來朝走馬至于岐下莊子應帝王南海之帝為儵北帝之帝為黑儵仵與地志縹緲峯洞庭之最高者

留題仙都觀

山前江水流浩浩山上蒼蒼松柏老
舟中行客去紛紛古今換易如秋草
空山樓觀何崢嶸真人王遠陰長生
飛符御氣朝百靈悟道不復誦黃庭
龍車虎駕來下迎去如旋風搏紫清
真人厭世不回顧世間生死如朝暮

學仙度世豈無人食霞絕粒長辛苦安得獨從逍遙君

冷然乘風駕浮雲超世無有我獨行

一作存

懷沙賦浩浩沅湘兮分流汨兮列仙傳王方平名遠漢
桓帝問災祥題宮門數百字帝令削之墨入版矣嘗過
吳門蔡經家遣使與麻姑相聞俄頃即至手似鳥爪衣
有文章而非錦繡坐定各進行厨香氣達戶外擗麟脯
行酒麻姑云接待以來東海三為桑田蓬萊水又淺矣
宴畢乘雲而去又陰長生新野人漢和帝后之曾祖不
好榮位從馬明生得度世法偕入青城山太清金液神
丹成著書九篇白曰昇天古詩飛符超羽翼神仙傳竇
子明好釣魚於旋溪釣得白龍解放之三年龍來迎去
又呼子仙者漢中卜師也壽百餘歲夜有仙人持二茅
狗來子仙持一與姬乃龍也騎之上華陰山又龔聖者
結菴於道人峰上每乘龍往來又張道陵游雲綿洞煉

丹青龍白虎旋繞其上莊子天地篇千載厭世去而上
仙乘彼白雲至於帝鄉逍遙遊不食五穀吸風飲露乘
雲氣御飛龍而遊乎四海之外
又列子御風而行泠然善也

屈原塔

公自注在惠州原不當有塔於
此意者後人追思故為作之

楚人悲屈原千歲意未歇精魂飄何處父老空哽咽至
今滄江上投飯救饑渴遺風成競渡猿叫楚山裂屈原
古壯士就死意甚烈世俗安得知眷眷不忍決南賓舊
屬楚山上有遺塔應是奉佛人恐子就淪滅此事雖無
憑此意固已切古人誰不死何必較考折名聲實無窮

富貴亦暫熱大夫知此理所以持死節

史記屈原者名平楚之同姓也為楚懷王左徒上官大夫短屈原於頃襄王王怒而遷之屈原至於江濱被髮行吟澤畔顏色憔悴形容枯槁乃作漁父之辭懷沙之賦懷石投汨羅而死李華弔古戰場文弔祭不至精魂何依續齊諧記屈原五月五日投汨羅江楚人哀之每至此日以竹筒貯米投水祭之漢建武中長沙歐回白龍所竊今若有惠可以揀葉塞其上以五彩絲縛之此二物蛟龍所畏今人作粽子以此蓋其遺風也荆楚歲時記五月五日競渡人傷屈原故以舟楫救之方輿記南賓古巴子國尚書洪範五福考終命六極凶短折

新灘

扁舟轉山曲未至已先驚白浪橫江起槎牙似雪城
番從高來一一投澗坑大魚不能上暴鱗一作灘下橫
小魚散復合淺濤如遭烹鸕鷀不敢下飛過兩翅輕白
鷺誇瘦捷插腳還歌傾區區舟上人薄技安敢呈只應
灘頭廟賴此牛酒盈

江淹別賦怨復怨兮遠山曲去復去兮長河湄司馬相
如上林賦臨城注壑灋灋實隆史記使得奏薄技出入
周衛之中

新灘阻風

北風吹寒江來自兩山口初聞似搖扇漸覺平沙走飛

雲滿崑谷舞電穿牕牖灘下三日留識盡灘

一作山

前叟

孤舟倦鷗軋短纜困牽揉嘗聞不終朝今此何其久只
應留遠人此意固亦厚吾今幸無事閉戶為飲酒

老子飄風不崇朝驟雨不終日孰為此
者天地天地猶不能久而況於人乎

昭君村

昭君本楚人艷色照江水楚人不敢娶謂是漢妃

一作家

予誰知去鄉國萬里為胡鬼人言生女作門楣昭君當

時憂色衰古來人事盡如此反覆縱橫安可知

一統志王嬙字昭君避晉文帝諱改曰明種歸人今歸
州有明妃廟漢書匈奴傳單于自言願娶漢氏以自親
元帝以後宮良家子王嬙字昭君賜單于單于歡喜白
居易詩生為漢宮妃死作胡地鬼楊妃外傳貴妃寵幸
時重謠曰生男勿喜女勿悲君看長大作門
楣韓非說難及彌子色衰而愛弛得罪於君

黃牛廟

夷陵志黃牛峽重巖峻絕加以江湍紆迴行者謠曰朝發黃牛暮宿黃牛三朝

三暮黃牛如故

江邊石壁高無路上有黃牛不復箱廟前行客拜且舞
擊鼓吹簫屠白羊山下耕牛苦硤确兩角磨崖四蹠溼

青島中東長苦飢仰看黃牛安可及

詩小雅晚彼牽牛不以服箱杜詩自有馮夷來擊鼓始知羸女善吹簫李白詩三朝上黃牛三暮行太遲三朝復三暮不覺髮成絲

蝦蟆培

峽州志扇子峽石中突而洩水獨清冷石狀如圭頭俗謂蝦蟆石其水煎茶為

第一培一作砢音佩

蟄背似覆盂蟄頤如偃月謂是月中蟄開口吐月液根源來甚遠百尺蒼崖裂當時龍破山此水隨龍出入江江水濁猶作深碧色稟受苦潔清獨與凡水隔豈惟煮

茶好釀酒應無敵

廣雅蠹蝦蟇也陸佃埤雅蝦蟇一名蟾蜍東方朔客難連四海之外以為帶安於覆孟張衡靈憲嫦娥奔月是為蟾蜍易乾鑿度月三日成魄八日成蟾光蟾蜍體就穴鼻始明輿地紀勝竹泉在荊州松滋縣南宋至和初苦竹寺僧浚井得筆後黃庭堅謫點過之視筆曰此吾蝦蟇所墜因知此泉與之相通其詩曰松滋縣西竹林寺苦竹林中甘井泉巴人謾說蝦蟇蟇試覆春茶來就煎

留題峽州甘泉寺

公自注姜詩故居

輕舟橫江來弔古悲純孝逶迤尋遠迹婉孌見遺貌清泉不可挹酒盡空石窖古人飄何之惟有風竹閒行行

翫村落户戶懸網罩民風坦和平開戶夜無鈔叢林富
笋茹平野絕虎豹嗟哉此樂鄉無乃姜子教

後漢列女傳廣漢姜詩妻者同郡龐氏之女也詩事母
至孝妻奉順尤篤母好飲江水水去舍六七里妻常泝
流而汲後時值風不時得還母渴詩責而遣之妻乃寄
止鄰舍晝夜紡績市珍羞使鄰母以意自遺其姑如是
者久之姑怪問鄰母鄰母具對姑感慙呼還恩養愈謹
姑嗜魚鱠又不能獨食夫婦嘗力作供鱠呼鄰母共之
舍側忽有涌泉味如江水每旦輒出雙鯉魚嘗以供二母之膳

寄題清溪寺

公自注在峽州
鬼谷子之故居

口舌安足恃韓非死說難自知不可用鬼谷乃真姦遺

書今未亡小數不足觀秦儀固新學見利不知患嗟時
無桓文使彼二子顛死敗無足怪夫子固使然君看巧
更窮不若愚自安遺宮若有神頷首然吾言

漢婁敬傳上怒罵敬曰齊虜以口舌得官乃今妄言沮
吾軍史記韓非者韓之諸公子也作孤憤五蠹內外儲
說難十餘萬言然韓非知說之難為說難書甚具終死
於秦不能自脫史記蘓秦傳東事師於齊而習之於鬼
谷先生又乃閉室不出出其書編觀之張儀傳始嘗與
蘇秦俱事鬼谷先生學術尹知章鬼谷子序蘓秦張儀
往事之受捫闔之術十有二章復受轉丸脰篋三章儀
秦知道未足行復往見先生曰為子陳言至道齋戒擇
日而往見先生乃正席而坐嚴顏而言告二子以全
身之道文心雕龍轉丸騁其巧辭飛鉗伏其精術

荆門惠泉

公自注荆門山在宜都大江之南與虎山對

泉源從高來走下隨石脈紛紛白沫亂隱隱蒼崖坼紫
回成曲沼清澈見肝膈衆瀉為長溪奔駛蕩蛙蝓初開
不容椀漸去已如帛傳聞此山中神物懶一作頗遭謫不
能致雷雨灑灑吐寒碧遂令山前人千古灌稻麥

說文泉水原也周易山下出泉爾雅泉一見一否為瀝
濫泉正出正出湧出也沃泉縣出縣出下出也沕泉穴
出穴出反出也僧史僧聞禪師往邵武山中一日有老
翁來謁曰我龍也以疲情行雨天罰當死賴道力可脫
乃化小蛇延緣入袖中夜風號雲擊山
岳為搖而師危坐不傾達旦蛇飛去

次韻答荆門張都官維見和惠泉詩

楚人少井飲地氣常不洩蓄之為惠泉至若有所拆泉
源本無情豈問濁與澈貪愚彼二水終古耻莫雪只應
所處然遂使語異別泉旁地平衍泉上山嵒嶮君子慎
所居此義安可闕古人貴言贈敢用況高節不為冬霜
乾肯畏夏日烈冷冷但不已海遠要當徹

國經貪泉在廣州海南縣石門口即吳隱所酌也舊經
云登大庾嶺則濁穢之氣分飲石門泉則清白之質變
則州記桂陽郡西南宿山水出注大溪號曰橫溪水甚
深冬夏不乾飲者輒胃於財賄俗謂之貪泉南齊書范

柏謁宋明帝帝言及廣州貪泉因謂曰卿州復有此不
對曰梁州惟有文里武鄉廉泉讓水曰卿宅何在曰廉
讓之間柳宗元愚溪序灌水之陽有溪焉東流入於瀟
水余以愚觸罪謫瀟水上愛是溪故更名之為愚溪注
愚溪在永州府城西史記孔子世家辭去而老子送之
曰吾聞富貴者送人以財仁人者送人以言王勃滕王
閣序臨
別贈言

涖陽早發

富貴本先

一作無

定世人自榮枯囂囂好名心嗟我豈獨

無不能便退縮但使進少徐我行念西國已分田園蕪
南來竟何事碌碌隨商車自進苟無補乃是懶且愚人

生重意氣出處夫豈徒永懷江陽叟種藕春滿湖

史記蔡澤傳富貴吾所自有班固答賓戲朝為榮華夕為顛顛陶潛歸去來辭田園將蕪胡不歸漢書武帝元光六年冬初算商車注始稅商賈車船令出冀原注江陽指眉州也

夜行觀星

天高夜氣嚴列宿森就位大星光相射小星鬧若沸
天人不相干嗟彼本何事世俗強指擿一一立名字南箕
與北斗乃是家人器天亦豈有之無乃遂自謂迫觀知
何如遠想偶有似茫茫不可曉使我長歎喟

春秋繫露天不剛則列星亂其行晉書凡五星盈縮失位其精降於地為人歲星降為貴臣熒惑降為童兒歌謠嬉戲填星降為老人婦女太白降為壯夫處於林麓辰星為婦人吉凶之應隨其象告後漢書光武曰郎官上應列宿詩小雅維南有箕不可以簸揚維北有斗不可以挹酒漿漢儒林傳轅固曰此家人言耳劉向新論微子感牽牛星顏子感中台星張良感弧星樊噲感狼星老子感火星莊子大宗師傳說乘東維騎箕尾而比於列星唐書李白母夢長庚星而生白因以名之

漢水

捨棹忽逾月沙塵困遠行襄陽逢漢水偶似蜀江清蜀江固浩蕩中有蛟與鯨漢水亦云廣欲涉安敢輕文王

化南國游女儼如卿洲中浣紗子環珮鏘鏘鳴古風隨
世變寒水空泠泠過之不敢慢佇立整冠纓

詩小雅滔滔江漢南國之紀寰宇記漢江在鄖陽府錄
漢中流入鄖縣其水因地而名曰漾曰沔曰漢曰滄浪
總之為漢水也上至襄陽七百里下至沔陽州五百里
異物志鯨鯢長百丈大亦稱之雄曰鯨雌曰鯢詩國風
漢有游女不可求思漢之廣矣不可泳思世說王安豐
婦曰親卿愛卿是以卿卿我不卿卿誰當卿卿舊經浣
紗溪在荊州府夷陵州西北秋冬之月水色淨麗若浣
紗然史記環珮玉聲璆然又滑稽傳冠纓索絕古詩李
下不
整冠

萬山

公自注時獨不
游問轍而作

西行度連山北出臨漢水漢水感成潭旋轉山之趾禪
房久已壞古甃含清泚下有仲宣欄綆刻深容指回頭
望西北隱隱龜背起傳云古隆中萬樹桑柘美月炯轉
山曲山上見洲尾綠水帶平沙盤盤如抱珥山川近且
秀不到懶成恥問之安能詳畫地費簪釜

襄陽志萬山在城西相傳鄭交甫所見游女居此山之
下萬山東有王繁井即仲宣樓在府城東繁依劉表即
此地非荊州也輿地志隆中山在府城北下即諸葛亮
隱居有三顧門漢書天文志抱珥重蜺注皆日旁氣也
凡氣在旁直對為珥在旁如半環向日為抱後漢馬援
傳於帝前聚米為山谷指畫形勢開示衆軍所從道徑

往來分析曲折昭然可曉蜀書許慈傳卓犖強識祖宗制度之儀喪紀五服之數皆指掌畫地舉手可采

隆中

諸葛來西國千年愛未衰今朝遊故里蜀客不勝悲誰言襄陽野生此萬乘師山中有遺貌矯矯龍之姿龍蟠山水秀龍去淵潭移空餘蜿蜒迹使我寒涕垂

蜀書諸葛亮傳字孔明瑯琊陽都人也躬耕龐玄好為梁父吟時先主屯新野徐庶見先主曰諸葛孔明者臥龍也將軍豈願見之乎先主曰君與俱來庶曰此人可就見不可屈致也先主遂詣亮凡三往乃見漢晉春秋亮家於南陽之鄧縣在襄陽城西四十里號曰隆中楊雄解嘲孟軻雖連蹇猶為萬乘師

竹葉酒

楚人汲漢水釀酒古宜城春風吹酒熟猶似漢江清
舊何人在丘墳應已平惟餘竹葉在留此千古情

輿地志宜城楚鄆陵漢宜城梁率道張協七命荆南烏程豫北竹葉古詩竹葉清香好何妨飲數杯杜詩三杯
竹葉清又竹葉於人既無分菊花從此不須開酒譜蒼梧之地釀酒以竹葉雜於中極清潔張華輕薄篇蒼梧
竹葉清宜成九醞酒梁昭明太子將進酒篇洛陽輕薄子長安遊俠兒宜城湓渠浣中山浮羽庖襄陽有耆舊
傳江淹恨賦琴瑟減兮丘隴平

鰕魚

曉日照江水遊魚似玉瓶誰言解縮項貪餌每遭烹杜
老當年意臨流憶孟生吾今又悲子輟筋涕縱橫

鰕雅鰕一名鮓比今之青鰕也郊居賦曰赤鯉青鰕細鱗
縮項鰕腹魚之美者蓋弱魚也其廣方其厚鰕故一曰鰕
魚一曰鰕魚鰕方也鰕鰕也襄陽志漢江出鰕魚土人以
槎斷水鰕多依槎因號槎頭鰕蓋浩然詩試垂竹竿釣果
得查頭鰕杜子美詩復憶襄陽孟浩然清詩句句盡堪傳
只今書舊無新語漫釣槎頭鰕項鰕晉書翟莊傳莊以弋
釣為事後不復獵曰獵自我釣自物未能煩盡故先
節其甚者且夫貪餌吞鉤豈我哉時人以為名言

望夫臺

公自注在忠
州南數十里

山頭孤石遠亭亭江轉舡回石似屏可憐千古長如昨

船去船來自不停浩浩長江赴滄海紛紛過客似浮萍
誰能坐待山月出照見寒影高伶俜

晉蘇峻傳我寧山頭望廷尉不能廷尉望山頭郡國志
昔人往楚累歲不還其妻登山望之久乃化為石後山
詩話望夫石在處有之詩以顧況山頭日日風和雨行
人歸來石應語為第一尚書禹貢江漢朝宗于海韓詩
外傳二親之壽忽如過客李白春夜宴桃園序光陰者
百代之過客周禮萍氏掌水禁鄭注以不沉溺取名蓋
使之幾酒謹酒也月令季春萍始生舊說萍善滋生一
夜七子一曰萍浮於流水則不生埤雅世說楊華入水
化為浮萍劉伶酒德頌俯觀萬
物擾擾馬如江漢之載浮萍

永安宮

公自注今夔之永安門即宮之遺址

千古陵谷變故宮安得存徘徊問耆老惟有永安門遊
人雜楚蜀車馬晚喧喧不見重樓好誰知昔日尊吁嗟
蜀先主兵敗此亡魂只應法正死使公去遭燔

蜀地記永安宮在夔州府治東今之府學也先主為陸
遜所敗還至白帝建此即諸葛亮受遺命處杜子美詩
崩年亦在永安宮毛詩高岸為谷深谷為陵三國志法
正傳字孝直右扶風郿人也年四十五卒先主為之流
涕者累日諸葛亮與正雖好尚不同以公義相取先主
將東征權以復關羽之恥羣臣多諫止不從章武二年
大軍敗績還住白帝亮歎曰法孝直若在則
能制主上令不東行就復東行必不傾危矣

八陣磧

平沙何茫茫
騶見石絕

于悅切

縱橫滿江上
歲歲沙水

蓄孔明死已久
誰復辨行列
神兵非學到
自古不留訣
至人已心悟
後世徒妄說
自從漢道衰
蠱起盡姦傑
英雄不相下
禍難久連結
驅民市無烟
戰野江流血
萬人賭一擲
殺盡如沃雪
不為久遠計
草草常無法
孔明最後起
意欲掃羣孽
崎嶇事節制
隱忍久不決
志大遂成迂
歲月去如瞥
六師紛未整
一旦英氣折
惟餘八陣圖
千古壯夔峽

水經注江水又東逕諸葛亮圖壘南石磧平曠望兼川
陸有亮所作八陣圖東跨故壘皆累細石為之自壘西
去聚石八行行間相去二丈因曰八陣荆州圖記永安
宮南一里渚下平磧上有孔明八陣圖聚細石為之各
高五尺廣十圍歷然暴露縱橫相當中間相去九尺正
中間南北巷悉廣五尺凡六十四聚成都圖經武侯八
陣有三在夔者六十有四方陳法也嘉話錄夔州之西
市俯臨江岸沙石下看諸葛亮八陣圖真張翼舒鵠形
鶴勢象石分布宛然尚存峽水大時巴蜀雪消之際大
樹十圍枯槎百丈破磴巨石隨波塞川而下水與岸齊
雷奔山裂及乎水落川平萬物皆失故態唯陣圖小石
分堆標聚行列依然如是者垂六七百年陶灑推激迨
今不動劉禹錫曰是諸葛公誠心為玄德歿死況此法
出六韜是太公上智之才所構所以神明保持一定而
不可改也圖經夔人重諸葛公每歲以人日傾城出游
磧上謂之踏磧唐韻東茅表位曰純春秋傳置茅蕝也

漢書叔孫通為綿蕪之儀註立竹束茅以為標
準按石蕪字先生特借用其意耳蕪一音最

諸葛鹽井

公自注井有十四自山下至山上其
十三井常空盛夏水漲則鹽泉迺運

遷去常去於江
水之所不及

五行水本鹹安擇江與井如何不相入此意復誰省人
心固難足物理偶相逞猶嫌取未多井上無閑綆

漢書蜀多鹽井羅褒以鹽井富洪範五行水曰潤下潤
下作鹹甘泉記甘露泉在林縣五行之理相尅相勝山
泉多甘而海水鹹蓋鹹者水歸本甘者土勝之也後漢
書光武曰人苦不知足莊子天運篇名公器也不可多
取又至樂篇綆短
者不可以汲深

潁大夫廟

一統志潯川縣有純孝伯廟即潁考叔

人情難彊回天性可微感世人爭曲直苦語費搖撼大
夫言何筭暴主意自慘荒祠旁孤塚古隧有殘坎千年
惟茅焦世亦貴其膽不解此微言脫衣徒勇敢

左傳鄭莊公寘姜氏於城潁而誓之曰不及黃泉無相見也既而悔之潁考叔為潁谷封人聞之有獻於公公賜之食食舍肉公問之對曰小人有母皆嘗小人之食矣未嘗君之羹請以遺之公曰爾有母遺繫我獨無因語之故且告之悔對曰君何患焉若闕地及泉隧而相見其誰曰不然公從之遂為母子如初史記呂不韋坐嫖毒免齊人茅焦說秦王云云說苑秦嫖毒之亂始皇遷太后於雍下令曰敢諫者死諫而死者二十七人齊

客茅焦解衣立井幹之上而諫云云始皇釋之迎歸太后母子如初法言茅焦可謂劇虎牙矣趙雲別傳先主明旦自來至雲營圍視昨戰處曰子龍一身都是膽也

許州西湖

寰宇記許州周許國魏許昌北齊南鄭後周許州

西湖小雨晴灩灩春渠長來從古城角夜半傳新響使君欲春遊浚沿役千掌紛紜具畚鍤開若蟻運壤天桃弄春色生意寒猶快惟有落殘梅標格若矜爽遊人空已集挈榼三且兩醉客臥道旁扶起尚偃仰池臺信宏麗貴與民同賞但恐城市歡不知田野愴潁川七不登

野氣長蒼莽誰知萬里客湖上獨長想

一統志河南西湖一在許州一在鄢陵湖誌舊傳許穎陳蔡接壤之間皆有西湖而汝陽為最孔武仲詩亭下湖光凝不流百尺高臺蘸春綠劉伶酒德頌止則操卮執觚動則挈榼提壺惟酒是務焉知其餘說丈榼酒器也莊子適莽蒼者三餐而反腹猶果然

江上值雪效歐陽體限不以鹽玉鶴鷺絮蝶飛
舞之類為比仍不使皓白潔素等字

縮頸夜眠如凍龜雪來唯有客先知江邊曉起浩無際
樹杪風多寒更吹青山有似少年子一夕變盡滄浪髭

方知陽氣在流水沙上盈尺江無漸隨風顛倒紛不擇
下滿坑谷高陵危江空野濶落不見入戶但覺輕絲絲
沾裳細看若巧一作刻鏤豈有一一天工為霍然一麾遍

九野吁此權柄誰執持世間苦樂知有幾令我幸免沾
膚肌山夫只見壓樵擔豈知帶酒飄歌兒天王臨軒喜
有麥宰相獻壽嘉及時凍吟書生筆欲折夜織貧女寒
無帟高人著履踏冷冽飄拂巾帽真仙姿野僧斫路出
門去寒液滿鼻清淋漓灑袍入袖溼靴底亦有執版趨

堦墀舟中行客何所愛願得獵騎當風披草中咻咻有
寒兔孤隼下擊千夫馳敲冰煮鹿最可樂我雖不飲強
倒卮楚人自古好弋獵誰能往者我欲隨紛紛旋轉從
滿面馬上操筆為賦之

晉佛圖澄傳石季龍造太武殿初成圖畫自古賢聖忠
臣孝子烈士貞女旬餘頭悉縮入肩中惟冠髻髻髻微
出雪賦盈尺則呈瑞於豐年後漢書河水流漸無船不
可渡朝野僉載要宜來見三白世說羣公對雪尚隆之
曰麴堆金井誰調湯餅吳永素曰玉滿天山難剡佩環
生閒暇其韻精宋書大同中元日雪花降殿庭右將軍
謝莊下殿雪集衣白上以為嘉瑞羣臣皆作雪花詩賀
褚少孫補史記齊東郭先生衣敝不完行雪中履有上

無下足盡踐地道中人笑之晉書王恭嘗披鶴氅涉雪而行孟昶見之曰此真神仙中人

渚宮

渚宮寂寞依古郢楚地荒茫非故基二王臺閣已鹵莽

公自注湘東王高氏

何況遠問縱橫時楚王獵罷擊靈鼓猛士操

舟張水嬉釣魚不復數魚鼈大鼎千石烹蛟螭當時郢人架宮殿意思絕妙般與倭飛樓百尺照湖水上有燕趙千娥眉臨風揚揚意自得長使宋玉作楚詞秦兵西來取鍾簾故宮禾黍秋離離十年壯觀不可復今之存

者蓋已卑池空野迴樓閣小惟有深竹藏狐狸臺中絳

帳誰復見臺下野水

一作鴨

浮清漪綠牕朱戶春晝閒想

見深屋彈朱絲腐儒亦解愛聲色何用白首談乳姬沙

泉半涸草堂在破牕無紙風颼颼陳公蹤跡最未遠士

一作七瑞寥落今何之百年人事知幾變直恐荒廢成空

陂誰能為我訪遺迹草中應有湘東碑

輿圖江陵泰郢地今荊州寰宇記江陵渚宮楚襄王建
梁元帝即位楚宮即此史記司馬相如子虛賦楚亦有
平原廣澤游獵之地饒樂若此者乎楚王之獵何與寡
人又擊靈鼓起烽燧上林賦撞十石之鐘立萬石之鉅

墨子公輸般造雲梯而攻齊典帝曰疇若予工僉曰垂
哉帝曰俞谷垂汝共工韓詩雕鐫妙工海史記管晏列
傳意氣揚揚甚自得也宋王高唐賦昔者楚襄王與宋
玉遊於雲夢之臺望高唐之觀王曰試為寡人賦之九
辯序九辯者楚大夫宋玉之所作也宋玉屈原弟子閔
惜其師忠而放逐故作九辯以述其志史記王翦傳李
信攻平與蒙恬攻寢大破荊軍信又攻鄢郢破之於是
引兵而西又殺其將項燕因乘勝畧定荊地城邑歲餘
虜荊王負芻竟平荊地為郡縣詩國風彼黍離離彼稷
之苗注周室東遷大夫行役過故宗廟宮室盡為禾黍
故賦此詩元稹連昌宮詞連昌宮中滿宮竹又夜夜孤
狸上墻屋荊州記府城西南有馬融絳帳臺與渚宮不
遠孔姬謂孔子周公南史梁元帝諱繹字世誠
小字七瑞武帝第七子也十三年封相東王

出峽

入峽喜巉巖出峽愛平曠吾心淡無累遇境即安暢東
西徑千里勝處頗屢訪幽尋遠無厭高絕每先上前詩
尚遺畧不錄久恐忘憶從巫廟回中路寒泉漲汲歸真
可愛翠碧光滿盎忽驚巫峽尾岩腹有穿壙仰見天蒼
蒼石室開南嚮宣尼古廟宇叢木作幃帳鐵楠橫半空
俯瞰不計丈古人誰架構下有不測浪石竇見天圉瓦
棺悲古葬新灘阻風雪村落去攜杖亦到龍馬溪茅屋
沾村釀玉虛悔不至實為舟人誑聞道石最奇寤寐見

怪狀峽山富奇偉得一知幾喪苦恨不知名歷歷但想像今朝脫重險楚水渺平蕩魚多客庖足風順行意王追思偶成篇聊助舟人唱

夔州志巫山在大江之濱形如巫字路史舜崩以瓦棺葬於紀是為鳴條三峽記巫峽與瞿唐峽歸峽世稱三峽連亘七百里重巖疊嶂隱蔽天日非亭午夜分不見日月水經云杜宇所鑿古語巴東三峽巫峽長猿鳴三聲淚霑裳竄宇記馬鳴溪在夔州府俗稱龍馬溪昔土人牧馬於溪上產龍駒四蹄利爪朱駿頰尾高可七尺州將聞之以貢行在所載至溪口懷鬣長鳴躍於江溪以名易坎卦習坎注習重習也坎險陷也彖曰習坎重也陰

神女廟

大江從西來上有千仞山江山自環擁恢詭富神姦深
淵鼉鼉橫去聲巨壑蛇龍頑旌陽斬長蛟雷雨移蒼灣蜀

守降老蹇至今帶連鐐縱橫若無主蕩逸侵人寰上帝
降瑤姬來處荆巫間神仙豈在猛玉坐幽且閑飄蕭駕
風馭彌節朝天闕倏忽巡四方不知道里艱古粧具法
服邃殿羅烟驤百神自奔走雜沓來趨班雲興靈怪聚
雲散鬼神還茫茫夜潭靜皎皎秋月彎還應搖玉珮來

聽水潺潺

左傳使民知神姦許旌陽旌陽於豫章過一少年目稱
慎郎真君與語知非人類謂門人施太玉曰此蜃精宜
亟剪戮彼今化為黃牛我當化黑牛以逐之以手巾挂
膊為識俄龍沙州一黑牛奔赴黃牛而來太玉以劍揮
之中其左股因投於井自井徑歸潭州先是少年以珍
寶數萬娶潭州刺史賈至女至是真君見賈曰聞君有
貴婿慎郎乃蛟蜃老魅焉敢適形蜃遂變本形為吏所
殺神異記蜀守李冰降毒龍塞氏鎖之於江上水害遂
息誓水碑記李冰鑿山導江其神怒化為牛出沒波上
水操刀入水殺之因立五石犀於水旁誓曰淺毋至足
深毋至肩水害遂息神女廟石刺瑤妃西王母之女稱
雲華夫人助禹驅神鬼斬石疏波有功見紀今封妙用
真人廟額曰凝真觀襄陽耆舊傳赤帝女曰瑤姬未行
而卒葬於巫山之陽故曰巫山之女楚懷王遊於高唐

晝寢夢與神遇遂為置觀於巫山之南號
為朝雲宋玉神女賦於是搖珮飾鳴玉鸞

巫山

瞿塘迤邐盡平峽崢嶸起連峯稍可怪石色變蒼翠天
工運神巧漸欲作奇偉塊軋勢方深結構意未遂旁觀
不暇瞬步步造幽邃蒼崖忽相逼絕壁凜可悸仰觀入
九頂俊爽凌顥氣晃蕩天宇高崩騰江水沸孤超兀不
讓直拔勇無畏攀緣見神宇憩坐就石位巉巉隔江波
一一問廟吏遙觀神女石綽約誠有以俯首見斜隤拖

霞弄修帔人心隨物變遠覺含深意野老笑吾旁少年
嘗屢至去隨猿獠上反以繩索試石笋猗猗峰突兀殊
不類世人喜神怪論說驚幼稚楚賦亦虛傳神仙安有
是次問掃壇竹云此今尚爾翠葉紛下垂婆娑綠鳳尾
風來自偃仰若為神物使絕頂有三碑詰曲古篆字老
人那解讀偶見不能記窮探到峰背採斫黃楊子黃楊
生石上堅瘦紋如綺貪心去不顧澗谷千尋絕山高虎
狼絕深入坦無忌洪濛草樹密蔥蒨雲霞膩石竇有洪

泉甘滑如流髓終朝自盥漱冷冽清心胃浣衣挂樹梢
磨斧就石鼻徘徊雲日晚歸意念城市不到今十年衰
老筋力憊當時伐殘木牙蘖已如臂忽聞老人說終日
為歎喟神仙固有之難在忘勢利貧賤爾何愛棄去如
脫屣嗟爾若無還絕糧應不死

劉安招隱士
塊兮軋山曲
峴兮淹畱兮
恫荒忽答賓
戲起忽荒而
蹠蒼巖封禪
書肇自顓穹
師古注顓顓
也元氣浩汗
故曰顓招隱
士攀緣桂枝
兮聊淹留荆
州圖記天門
角上特生一
竹倒垂拂拭
謂之天帚永
嘉記陽嶼有
仙石山頂上
有平石方十
餘丈名為仙
壇壇隙凡有
四竹歲蕤青
翠風來動音
自成宮商石
上淨潔初無
塵

籀相傳云曾有却粒者於此羽化故謂之仙壇仙經曰
神山五百年一開其中石髓出得而服之壽與天相畢
金玉之精也神仙傳王烈入太行山忽見山破石裂青
泥流出如髓烈取食之如飴史記封禪書於是天子曰
嗟乎吾誠得如黃帝吾
視去妻子如脫屣耳

觀大水望朝陽巖作

朝陽巖前不結廬下眺江水百步餘春泉濺濺出乳竇
青莎白石半滄涂不到津頭二三日誰知江水漲天墟
遙望橫盃不敢濟巖口正有人冒魚

列子無底之
谷名曰歸墟

滄洲亭懷古

湘水悠悠天際來，夾江古水挹山回。
城中人物若可數，日晏市散多蒼苔。
九嶷巉天古雲埋，遙想帝子龍車迴。
心衰目極何可望，九歌寂寂令人哀。

長沙志：湘江府城西，水至清澈。圖經：九嶷山在寧遠屬衡州府唐元結九嶷圖記：九峯相似，望而疑之，故名太公曰：舜死於蒼梧之野，歸葬於江南之九嶷。王韶之神鏡記：九嶷山半皆植松竹，夾路有青澗，澗生黃色蓮花，香氣盈谷。又有九井，昔何侯煉丹於此，汲一井則九井皆動，屈原九歌：帝子降兮北渚，又九疑續兮並迎靈之來兮。如雲尚書：大禹謨：九功惟叙，九叙惟歌。又勸之以九歌，俾勿壞。按此因九嶷而思舜，故言九歌寂寂似非。

屈原九
歌也

柏家渡

柏家渡西日欲落青山上下猿鳥樂欲因新月望吳雲
遙看北斗挂南嶽一夢惓惓四十秋古人不死終未休
草舍蕭條誰與語香風欲過白蘋洲

寰宇記衡山即南嶽也周八百里上有七十二峰其峰
高峻者五而祝融為最九域志南嶽衡山上承翼軫鈴
總萬物故名衡山度應斗衡位直離宮故
曰南岳左傳祈招之惓惓唐韻惓靖也

清遠舟中寄耘老

一統志清遠漢中宿地在今
廣州宋史賈收字耘老烏程

人有詩名喜飲酒李
公擇蘇子瞻與之游

小寒初度梅花嶺萬壑千岩背人境清遠聊為泛宅行
一夢分明墮鄉井覺來滿眼是湖山鴨綠波搖鳳凰影
海陵居士無雲梯歲晚結廬賴水湄山腰自懸蒼玉珮
野馬不受黃金羈門前車蓋獵獵走笑倚清流數鬢絲
汀洲相見春風起白蘋吹花散烟水萬里飄蓬未得歸
目斷滄浪淚如洗北鴈南來遺素書苦言大浸沒我廬
清齋十日不燃鼎曲突往往巢龜魚今年玉粒賤如水

青銅欲買囊已虛人生百年如寄爾七十朱顏能有幾
有子休論賢與愚倪生枉卻帶經鋤天南看取東坡叟
可是平生廢讀書

南安志大庾嶺其上多植梅又名梅嶺世說顏真卿為
湖州刺史張志和來謁真卿以其舟敝漏請更之志和
曰願為浮家泛宅往來若雪間道經太玉佩金鐙吳
筠詩白馬黃金羈後漢獨行傳范丹所止單陋有時絕
粒閭里歌之曰甌中生塵范史雲釜中生魚范菜蕪漢
兒寬傳受業孔安國貧無資用嘗為弟子都養時行賃
作帶經而鋤

書堂嶼

蒼山古木書堂嶼北出湘水百餘步誰為往來虧世界
至今人指安禪處豈無驚蛇與飛鳥後來那復知其趣
不知我身今是否空記名稱作常住

楞嚴經了然自知獲本妙心常住不滅釋典初
禪修五法四禪離八災患名不動地是為安禪

戲詠子舟畫兩竹兩鸚鵡

風晴日煖搖雙竹竹間對語雙鸚鵡鸚鵡之肉不可食
人生不才果為福子舟之筆利如錐千變萬化皆天機
未知筆下鸚鵡語何似夢中蝴蝶飛

春秋昭二十五年有鸛鵒來巢廣雅鸛鵒似鵒而有憤
兩翼有白點剪其舌可教以人語方言鸛鵒一名寒臯
杜詩有鳥名鸛鵒力不能高飛肉味不足登鼎俎胡為
見羈虞網中南部新書柳公權筆偈曰圓如錐捺如鑿
只得入不得卻莊子齊物論昔者莊周夢為蝴蝶栩栩
然蝴蝶也人問世故未終其天年而中道之夭於斧斤
此材之患也不才
為福句與莊同旨

贈山谷子

黃童三尺世無雙筆頭衰衰懸秋江不憂老子難為父

平生崛起今心

一作已

降我來喜共阿戎語應敵縱橫如

急雨生子還如孫仲謀豚犬謾多何足數黃家小兒名

拾得眉如長松眼如漆只今數歲已動人老人留眼看
他日笑君老蚌生明珠自笑此物吾家無君當置酒我
當賀有兒傳業更何須

後漢書天下無雙江夏黃童再見晉伏滔傳孝武帝嘗
會於西堂滔豫坐還下車先呼子系之謂曰百人高會
天子先問伏滔在坐不為人作父如此定何如也晉王
戎傳阮籍常適戎父渾俄頃輒去過戎良久然後出謂
渾曰共卿言不如共阿戎談三國志曹公曰生子當如
孫仲謀若劉景升兒子豚犬耳晉杜乂傳王羲之見而
目之曰膚若凝脂眼如點漆此神仙人也孔融與常端書不意雙珠近出老蚌

鰕魚行

漸臺人散長弓射初噉鰻魚人未識西陵衰老總帳空
冑向北河親饋食兩雄一律盜漢家嗜好亦若肩相差
食每對之先太息不因噎嘔緣瘡痂中間霸據關梁隔
一枚何啻千金直百年南北鮭菜通往往殘餘飽臧獲
東隨海舶號倭螺異方珍寶來更多磨沙淪潘成大截
剖蚌作脯分餘波君不聞蓬萊閣下馳碁島八月邊風
備胡獠舫舩跋浪鼃鼉震長鏡鏹處崖谷倒膳夫善治
薦華堂坐令雕俎生輝光肉芝石耳不足數醋芼魚皮

真倚牆中都貴人珍此味糟汜油藏能遠致割肥方厭
萬錢厨決皆可醒千日醉三韓使者金鼎來方奩饋送
煩輿臺遼東太守遠自獻臨菑掾吏誰為材吾生東歸
收一斛包苴未肯鑽華屋分送羹材作眼明卻取細書
防老讀

漢書郊祀志北治大池漸臺高二十餘丈名曰泰液師
古注漸浸也臺在池中受水所浸故曰漸臺漢武故事
漸臺高三十丈南有壁門三層內殿堂陛咸以土為之
鑄銅鳳凰高五丈飾以黃金樓屋上漢王莽傳莽就車
之漸臺欲阻池水猶抱持符命威斗軍人入殿中呼曰
反虜王莽安在有美人出房曰在漸臺衆兵追之圍數

百重臺上亦弓弩與相射稍稍落去矢盡無以復射短
兵接初莽憂慙不能食亶飲酒啗鰕魚亶與但通一
志銅雀臺在彰德府臨漳縣魏操所築上有樓鑄大銅
雀高一丈五尺置之樓巔操臨終遺令施總帳於上使
宮人歌吹帳中望吾西陵墓田世說劉邕嘗詣孟靈休
靈休先患疾瘡痂落在牀邕取食之靈休大驚痂未落
者悲號噉邕去靈休與何勗書曰適劉邕向顧見噉
遂舉體流血注瘡痂味似鰕魚故也南史褚彥回傳時
淮北屬江南無復鰕魚或有間闕得至者一枚直數千
錢人有餉彥回鰕魚三十枚彥回時雖貴而貧薄過甚
門生有獻計賣之云可得十萬錢庾杲之傳清貧自業
食惟有韭菹生韭雜菜任昉嘗戲之曰誰謂庾郎貧
食鮭嘗有二十七種注韭與九同音故謂三韭是二十
七廣志鰕無鱗有殼一面附石細孔雜雜或七或九北
齊顏之推云即石決明內旁一年一孔至十二孔而止
以合歲數登州所出其味珍絕先武時張步據青徐道

使詣闕上書獻鰻魚即此本草鰻魚治青盲失精方與
記蓬萊閣在登州丹崖山閣上望海如鏡忽有若黑豆
數點者郡人云海舶至矣不一炊許已至閣下馳碁岳
一曰鰻磯岳在蓬萊海中產硯石金星雪浪者佳晉書
何曾厨膳滋味擬於王者日食萬錢猶云無下筋處魏
都賦醇酎中山流湏千日忘怪齊人田無已釀千日酒
過飲一斗醉臥千日方醒搜神記狄希中山人能造千
日酒飲之千日醉又劉玄石千日醉見博物志莊子列
禦寇小夫之智不離苞苴竿牘散精神乎塞淺

次韻水官詩

淨因大覺理師以閩立本畫水官遺編禮公公既
報之以詩謂某汝亦作某頓首再拜次韻仍錄二

詩為一卷以獻

附老泉詩水官騎蒼龍龍行欲上天手攀時且住浩若乘風船不知

幾何長足尾猶在淵下有二從臣左右乘魚鼈
雙鑠相顧視風舉衣袂翻女子侍君側白頰垂
雙鬢手執雉尾扇容如未開蓮從者八九人非
鬼非戎蠻出水未成列先登揚旗壇長刀擁旁
牌白羽注強弩雖服甲與裳狀貌猶鯨鱣水獸
不得從仰面以手扳空虛走雷霆雨雹晦九川
風師黑虎囊面目昏塵烟翼從三神人萬里朝
天闕我從大覺師得此詭怪編畫者古闔子於
今三百年見者誰不愛予者誠已難在我猶
在予此理寧非禪報之以好詞何必畫在前

高人豈學畫用筆乃其天譬如善游人一一能操船閫

子本逢掖疇昔慕雲淵丹青偶為戲染指初嘗龜愛之

不自已筆勢如風翻傳聞正觀中左袵解椎髻南夷羞
白雉佛國貢青蓮詔令擬王會別殿寫戎蠻熊冠金絡
額豹袖擁旂纛傳入應門內俯伏脫劍卷天姿儼龍鳳
雜沓朝鵬鱣神功與絕跡後世兩莫扳自從李氏亡羣
盜竊山川長安三日火至寶隨飛烟尚有脫身者漂沔
出東關三官豈容獨得此今已編吁嗟至神物會合當
有年京城諸權貴欲取百計難贈以玉如意豈能動高
禪信應一篇詩皎若畫在前

莊子達生篇顏淵問仲尼曰吾嘗濟乎鴈深之淵津人操舟若神吾問焉曰操舟可學耶曰可善遊者數能若乃夫沒人則未嘗見舟而便操之也江淹別賦雖淵雲之墨妙嚴樂之筆精注王褒字子淵揚雄字子雲唐書周立本傳太宗與侍臣泛舟春苑池見異鳥容與波上悅之詔坐者賦詩而召立本侔狀閣外傳呼畫師閻立本是時已為主爵郎中俯伏池左研吮丹粉望坐者羞悵流汗歸戒其子曰吾少讀書文辭不減儕輩今獨以畫見名與厮役等若曹慎毋習然性所好雖被謗屈亦不能罷也既輔政但以應務俗材無宰相器時姜恪以戰功擢左相故時人有左相宣威沙漠右相馳譽丹青之嘲左傳楚人獻鼃於鄭靈公子公之食指動謂子家曰必嘗異味及宰夫解鼃食大夫不與子公子公染指於鼎嘗之而出譚賓錄貞觀三年東蠻謝元深入朝中書侍郎顏師古奏言昔周武王治致太平遠國歸款乃集其事為王會篇可圖寫貽後以彰服遠之德從之乃

命尚書閻立本畫之為職貢圖唐畫斷閻立德創職貢圖異方人物詭怪之狀第立本畫國王粉本晉南北兩朝名手不是過也唐太宗本紀龍鳳之姿天日之表胡踪別傳吳時秣陵掘地有得白玉如意大帝以問琮琮對曰秦始皇以金陵有天子氣處輒埋寶物以當王氣此殆是乎

弔徐德占并序

余初不識德占但聞其初為呂惠卿所薦以處士用元豐五年三月偶以事至蘄水德占聞余在傳舍惠然見訪與之語有過人者是歲十月聞其遇禍作詩弔之

美人種松柏欲使低映門栽培雖易長流惡病其根哀

哉歲寒姿骯髒誰與論

一作言

竟為明所悞不免刀斧痕

一遭兒女污始覺山林尊從來覓棟樑未免傍籬藩
南山隔秦嶺千樹龍蛇奔大厦若畏傾萬牛何足言不然
老巖壑合抱枝生孫死者不可悔吾將遺後昆

柳宗元枯松詩不以險自防遂為明所誤杜甫
古栢行大厦如傾要梁棟萬牛回首丘山重

題李伯時淵明東籬圖

彼哉嵇阮曹終以明自膏靖節固昭曠歸來侶蓬蒿新

霜著疎柳大風起江濤東籬理黃華意不在芳醪白衣
挈壺至徑醉還遊遨悠然見南山意與秋氣高

顏延年陶徵士誄夫實以誄華名由謚高荀允德義貴
賤何算焉若其寬樂令終之美好廉克己之操其合謚
典無愆前志故詢諸友好宜謚曰靖節徵士續晉陽秋
陶潛嘗九月九日無酒於宅邊東籬下菊叢中摘盈把
坐其側未幾望見白衣人至乃刺史王弘送酒也即便
就酌醉而後歸陶詩采菊東籬下悠然見南山杜甫詩
每恨陶彭澤無錢對菊花如今九日至自覺
酒須賒杜牧詩南山與秋色氣勢兩相高

李白謫仙詩

我居青空東君隱黃埃中聲形不相弔心事難形容欲

乘明月光訪君開素懷
天盃飲清露展翼登蓬萊
佳人持玉尺度君多少
才玉尺不可盡君才無時休
對面一笑語共躡金黿頭
絳宮樓闕百千仞霞衣誰與雲烟浮

韓退之謁衡嶽廟詩須臾靜掃衆峯出仰見突兀撐青空
唐書上官婉兒初生時其母夢神與大稱曰持此稱量天下又趙光逢以文章名人謂玉界尺紀聞談錄有海客言一夜見海中大黿浮出目光照耀天地如白晝
蓋金黿也

數日前夢一僧出二鏡求詩僧以鏡置日中其影甚異其一如芭蕉其一如蓮花夢中與作詩

君家有二鏡光景如湛盧或長如芭蕉或圓如芙蕖飛
電著子壁明月入我廬月下合三壁日月跳明珠問子
是非我我是非文殊

越絕書歐冶乃因天之精神悉其伎巧造為大劍三小
劍二一曰湛盧二曰純鉤三曰勝邪四曰魚腸五曰巨
闕吳王闔廬之時得其勝邪魚腸湛盧闔廬亡道子女
死殺生以送之湛盧之劍去之如水楞嚴經如汝文殊
更有文殊是文殊者為無文殊如第二月
誰為是月又誰非月又於自心現大圓鏡

飲酒四首

我觀人間世無如醉中真虛空為銷殞況乃百憂身惜

哉知此晚坐令華髮新聖人驟難得日且致賢人

莊子有人間世篇楞嚴經阿難汝觀世間可作之法誰為不壞然終不聞爛壞虛空又我此無常變壞之身雖未曾滅我觀現前念念遷謝新新不住如火成灰漸漸銷殞魏書徐邈傳時科禁酒而邈私飲至於沉醉校事趙達問以曹事邈曰中聖人達白之太祖太祖甚怒渡遼將軍鮮于輔進曰平日醉客謂酒清者為聖人濁者為賢人

左手持蟹螯舉觴屬雲漢天生此神物為我洗憂患山川同恍惚魚鳥共蕭散客至壺自傾欲去不得閒

晉畢卓傳卓嘗謂人得酒滿數百斛船四時甘味置兩頭右手持酒杯左手持蟹螯拍浮酒船中便足了一生

笑魏武短歌何以
解憂惟有杜康

有客遠方來酌我一甌若我醉方不啜強啜忽復醒既
鑿渾沌氏遂遠華胥境操戈逐儒生舉觴還酹酊

莊子應帝王曰鑿一竅七日而渾沌死列子黃帝晝寢
夢遊華胥其國入水不溺入火不熱乘空如履實寢虛
若處寐既寤怡然自得其後天下大治幾若華胥矣又
宋陽里華子中年病忘魯有儒生自媒能治之華子之
妻子以居產之半請其方儒生獨與居七日而積年之
疾一朝俱除華子既悟乃大怒黜妻罰子操戈逐儒生
曰曩吾忘也蕩蕩然不覺天地之有無今頓識既往數
十年來存亡得失哀樂好惡擾擾萬緒起矣須臾之忘
可復得乎

雷觴淡於水經年不濡唇爰有擾龍裔為造英靈春英
靈韻甚高蒲萄難與鄰他年血食汝當配杜康神

家語君子之交淡於水左傳有劉累者善擾龍洛陽伽
藍記河東人劉白墮善釀六月以罌貯酒暴於日中經
一旬其酒不動飲之香美醉而經月不醒朝貴相餉踰
於千里以其遠至號曰鶴觴如鶴之一飛千里也史記
大宛國以蒲萄為酒富人藏酒至萬餘石久者至數十
歲不敗世本杜康作秫酒晉江統酒誥酒之所興肇自
上皇或曰儀狄一曰杜康唐王績傳聞大樂署焦革家
善釀復求為大樂丞革死妻送酒不絕歲餘又死乃弃
官去所居東南有盤石
立杜康祠以焦革配

大雪獨留尉氏

尉氏屬河南開
封府本秦縣

古驛無人雪滿庭有客冒雪來自北紛紛笠上已盈寸
下馬登堂面蒼黑苦寒有酒不能飲見之何必問相識
我酌徐徐不滿觥看客倒盡不留溼千門晝閉行路絕
相與笑語不知夕醉中不復問姓名上馬忽去橫短策
左傳楚子乘驛爾雅駟遽傳也漢書注傳若今之驛古
者以車謂之傳車其後單置馬謂之驛騎詩小雅彼都
人士臺笠緇撮古注臺夫須也即莎草謂以夫須皮為
笠所以禦暑雨左傳繞朝贈之以策注馬鞭也晉元逸
傳送客冒寒

舉體凍濕

阮籍嘯臺

阮生古狂達遁世默無言猶餘胸中氣長嘯獨軒軒高
情遺萬物不與世俗論登臨偶自寫激越蕩乾坤醒為
嘯所發飲為醉所昏誰能與之較亂世足自存

陳留風俗傳阮嗣宗善嘯聲與琴諧陳留有阮公嘯臺
世說袁羊古之遺狂晉書阮籍字嗣宗陳留尉氏人嗜
酒能嘯善彈琴文帝初欲為武帝求婚于籍籍醉六十
日不得言而止籍雖不拘禮教然發言玄遠口不臧否
人物嘗於蘇門山遇孫登與商略終古及栖神導氣之
術登皆不應籍因長嘯而退至半嶺聞有聲若鸞鳳之
音響乎巖谷乃登嘯也又籍本有濟世志屬魏晉之際
天下多故名士少有全者籍由是不與世事遂酣飲為
常

留別叔通元弼坦夫

田三昔同寮向我每傾倒當年或齟齬反覆看愈好寇
三我部民孝悌化鄰保有如袁伯業苦學到衰老石生
吾邑子勁立風中草宦遊甌生塵飯水媚翁媪我窮交
舊絕計拙集枯槁三子尤見存往復紛紜縞迎我淮水
北送我睢陽道願存金石契凜凜貫華皓

左傳同官為寮吾嘗同寮敢不盡心乎文帝典論太祖
稱長大而能勤學者惟吾與袁伯業耳魏武本紀山陽
太守袁遺注字伯業紹從兄古詩疾風知勁草履甌范
萊蕪事注見前史記吾翁即若翁又母曰劉媪注媪母別

名音鳥老反一曰媼女老稱也後世父母稱翁媼本此
莊子天下篇雖枯槁不舍也才士也夫國語人皆集於
苑子獨集於枯左傳吳季札聘於鄭見子產如舊相識
與之縞帶子產獻紵衣焉韓詩外傳熊渠子見其誠心
而金石為之開況於人乎孟郊雷友詩莫躡冬冰堅中
有潛浪翻惟當金石交可與賢達論華顓皓首皆謂白
頭

和寄天選長官

寓形宇宙間俟我方以老流光安足恃百歲同過鳥頃
子縈網羅文采緣自表自古山林人何曾識機巧但記
寒巖翁論心秋月皎黃香十年舊禪學參衆妙虛懷養

天和肩狗奔走閒官居職事理晨起何用早桐陰滿西

齋叱吏供灑掃眷子東南來野飯煮芹蓼葆光既清尚

令尹亦高蹈相將古寺行軟語頽晚照公家有畸人

公

族人隱嵩山

虛緣能自保卜築嵩山陽何

一作行

當從結好中

山饒勝景一覽未易飽何時命巾車共陟雲外嶠翻然

一作思

筋力疲不復追踴跳公詩擬南山雄拔千丈峭形

容逼天真邂逅識其要藩籬吾未窺敢議窮閭奧

歸去來辭寓形宇內復幾時莊子大宗師大塊載我以形勞我以生佚我以老息我以死金樓子楚國樊舍初

隨楚王朝宿未央宮見赤蜘蛛大如栗四面縈羅網有
蟲觸之而死者進而不能得出焉舍乃歎曰吾生亦如
是耳仕宦人之羅網也豈可淹歲於是挂冠而退時人
謂之蜘蛛隱莊子齊物論此之謂葆光大宗師畸人者
畸於人而侔於天杜子美詩夜開接軟語歸去來辭或
命巾車或棹孤舟孔叢子巾車命駕將適唐都注以衣
飾車也韓退之有南山詩凡百有二韻詩國風邂逅相
遇適我願兮宋玉對楚王問夫藩籬之鷄豈能與之料
天地之高哉爾雅
西南隅謂之奧

昭陵六馬唐文皇戰馬也琢石象之立昭陵前
客有持此石本示予為賦之

天將剗隋亂帝遣六龍來森然風雲姿颯爽毛骨開飈

馳不及視山川儼莫回長鳴視八表擾擾萬駕駘秦王
龍鳳姿魯鳥不足摧腰間大白羽中物如風雷區區數
豎子搏取若提孩手持掃天帚六合如塵埃艱難濟大
業一一非常才維時六驥足績與英衛陪功成鏘八鸞
玉輅行天街荒涼昭陵闕古石埋蒼苔

唐書太宗本紀生四歲有書生謁高祖曰公在相法貴人也然必有貴子及見太宗曰龍鳳之姿天日之表其年幾冠必能濟世安民周禮馬八尺以上為龍杜予美詩英姿颯爽來酣戰又卓立天骨森開張六翮臨堅陣敗強敵用大黃參連弩飛鳧電影自副飛鳧亦並白羽以銅為首電影青莖赤羽以銅為首杜詩猛將腰間大

羽箭唐書太宗嘗自製長弓大羽箭皆倍常
箭以旌武功英衛英公徐世勣衛公李靖

顏闔

顏闔古有道躬耕自衣食區區魯小邦不足隱明德輶
軒來我門聘幣繼金璧出門應使者耕稼不謀國但疑
誤將命非敢憚行役使者反錫命戶庭空履跡薄俗狗
世榮截趾履之適所重易所輕隋珠彈飛翼伊人畏照
影獨往就陰息鼎俎薦忠賢誰能死燔炙念彼藏皮冠
安知獲克客

莊子讓王篇魯君聞顏闔得道之人也使人以幣先焉
顏闔守陋閭苴布之衣而自飯牛魯君之使者至顏闔
自對之使者曰此顏闔之家與顏闔對曰然使者致幣
顏闔曰恐聽者謬而遺使者罪不若雷之使者還反雷
之後來求之則不得已達生篇忘足履之適也讓王篇
今且有人於此以隋侯之珠彈千仞之雀世必笑之是
何也則以所用者重而所要者輕也漁父篇人有畏影
惡迹而去之走者舉足愈數而迹愈多不知處陰以休
影處靜以息迹愚亦甚矣左傳臣不見皮冠不敢進也
南史明僧紹屢徵不至隱于攝山高帝謂其弟慶符曰
卿兄高尚其事亦先之外臣朕夢想幽人固已勤
矣所謂徑路絕風雲通仍賜竹根如意筍簪冠

贈狄崇班季子

狄生臂鷹來見客不會捐踞牀咤得雋借筋數禽入短

後掬豹裘猶濺猩血溼指呼索酒嘗快作長鯨吸半酣
論刀掣怒髮欲起立北方老獬豸狂突尚不繫要須此
慄悍氣壓邊烽急夜走走追鋒車生斬活離級持歸獻天
王封侯穩可拾何為走獵師日使羣毛泣

南史張克傳字延符少好逸遊父緒嘗告歸至吳始入
西郭逢克獵石臂鷹左牽狗遇緒船至便放絀脫講拜
於水次緒曰一身兩役無乃勞乎莊子吾王所見劍士
皆蓬頭突鬢垂冠曼胡之纓短後之衣瞋目而語難杜
詩笑指銀瓶索酒嘗又飲如長鯨吸百川史記怒髮上
衝冠纂文獬豸屈尾犬也記獻犬則執縶注絀繫也按老
獬豸謂契丹也古今注追鋒車去巾蓋施通憶遠則乘
之晉杜預傳給追鋒車第二駙馬班固賦四夷聞秦德

廣所極傑侏離罔不具集活離疑即侏離漢書夏侯
勝每講授謂諸生曰士病不明經術經術苟明其取青
紫如俛拾地芥耳後漢班超傳立功異域以取封侯萬
里之外安能久事筆硯間乎班賦風毛雨血灑野蔽天

題盧鴻學士堂圖

唐書盧鴻字顥然范陽人徙洛陽博學善書籀結廬嵩山

名所居廬曰寧極
開元禮徵不至

昔為太室花盧岩在東麓直上登封壇一夜繭生足徑
歸不復往巖壑空在目安知有千老舒卷不盈軸一處
一廬生裘褐蔭喬木方為世外人行止何煩錄百年入
篋笥犬馬同一束嗟予縛世累歸未有茅屋江千百畝

田清泉映修竹尚欲逃世名豈須上圖軸

一統志嵩山在登封即中嶽東曰太室西曰少室淮南子楚王欲攻宋墨子聞之自魯而趨楚十日十夜足重繭而不休息杜詩足繭荒山轉愁疾後漢法真傳友人郭正稱之曰法真名可得聞身難得而見逃名而名我隨避名而名我退可謂百世之師矣

寄周安孺茶

大哉天宇內植物知幾族靈品獨標奇迥超凡草木名

從姬旦始漸播桐君錄賦詠誰最先厥傳惟杜育

育當作毓

唐人未知好論著始於陸常李亦清流當年慕高躅遂

使天下士嗜此偶於俗豈但中土珍魚之異邦嚮鹿門
有佳士博覽無不矚邂逅天隨翁篇章互賡續開園頤
山下屏跡松江曲有興即揮毫粲然存簡牘伊予素寡
愛嗜好本不篤粵自少年時低回客京轍雖非曳裾者
庇蔭或華屋頗見綺紈中齒牙厭梁肉小龍得屢試冀
土視珠玉團鳳與葵花硃硃雜魚目貴人自矜惜捧玩
且緘積未數日注卑定知雙井辱於茲自研討至味識
五六自爾入江湖尋僧訪幽獨高人固多暇探究亦頗

熟聞道早春時攜羸赴初旭驚雷未破蕾來來不盈掬
旋洗玉泉蒸芳馨豈停宿須臾布輕縷火候謹盈縮不
憚頃閒勞經時廢藏蓄騷筒淨無染箬籠勻且複苦畏
梅潤侵暖須人氣燠有如剛耿性不受纖芥觸又若廉
夫心難將微穢瀆晴天敞虛府石碾破輕綠永日遇閑
賓乳泉發新馥香濃奪蘭露色嫩期秋菊閩俗競傳誇
豐腴面如粥自云葉家白頗勝中山醪好是一杯深午
臆春睡足清風擊兩腋去欲凌鴻鵠嗟我樂何深水經

亦屢讀子哢中冷泉次乃康王谷癖培頃曾嘗瓶罌走
僮僕如今老且懶細事百不欲美惡兩俱忘誰能強追
逐薑鹽拌白土稍稍從吾蜀尚欲外形體安能徇心腹
由來薄滋味日飯止脫粟外慕既已矣胡為此羈束昨
日散幽步偶上天峰麓山圃正春風蒙茸萬旗簇呼兒
為佳客採掣聊亦復地僻誰我從包藏置厨簾何嘗較
優劣但喜破睡速況此夏日長人間正炎毒幽人無一
事午飯飽蔬菽困卧北牕風風微動牕竹乳甌十分滿

人世真局促意爽飄欲仙頭輕快如沐昔人固多癖我癖良可贖為問劉伯倫胡然枕糟麴

爾雅檟苦茶郭璞注樹小似柘子冬生今呼早采者為茶晚取者為茗爾雅始於周公故曰名從姬旦始晉杜輒薛賦煥如積雪煢若春蕞雲溪友議陸羽字鴻漸唐人著茶經三卷造茶具二十四事時鸞茶者以陸羽為茶神芝芸叟談貞元中常袞為建州刺史始蒸焙而研之謂之研膏茶中朝故事李德裕有親知授舒州牧李曰到郡日天柱峯茶可惠三四角因話錄李約性嗜茶常曰茶須緩火炙活火煎蓋謂老湯三沸之法非活火不能成也唐書党魯使西番烹茶帳中番使問何為魯曰滌煩療渴所謂茶也番使曰我亦有之命取出以示曰此壽春者此顧渚者此新門者唐書皮日休字襲美襄陽人以詩文著隱鹿門山中自號閭氣布衣與華亭

陸龜蒙友善陸號天隨子松陵集有皮日休茶人詩云
生於顧渚山老在漫石塢陸龜蒙詩云且共薦舉盧何
勞傾斗酒歸田錄茶之品莫貴於龍鳳團凡八餅重一
斤慶曆間蔡君謨為福建運使造小片龍團其品精絕
謂之小龍團凡二十餅重一斤其價值金二兩每南郊
致齋中書樞密各賜一餅宮人往往鏤金其上其貴重
如此茶譜蒙山頂曰上清峯茶最艱得侯雷發聲採之
茶鉢藏茶宜弱葉而喜過燥故收藏之家以弱葉封裹
入焙中三兩日一次用火常如人體溫溫然以禦濕潤
又茶以建寧貢為上有石乳滴乳龍鳳團等名皆碾末
作餅中山酒注見前盧仝茶歌五碗肌骨清六碗通仙
靈七碗吃不得也惟覺兩腋習清風生中朝故事李
德裕居廟廊日有親知奉使京口李白還日金山下江
中冷水取置一壺來其人忘之舟上石頭城方憶及汲
一瓶歸京獻之李飲後大咤曰江南水味有異於頃歲
此頗似建業石頭城下水其人謝過不敢隱張又新載

陸羽品天下二十水揚子中冷水第七南康記谷簾泉
在府城西泉水如簾布巖而下者三十餘派陸羽品其
味為天下第一廬山記康王谷楚康王照為秦將王翦
所窘匿此桑喬山疏云在康王谷中故名谷簾蝦蟆培
注見前張又新煎茶記粉檄末旗蘓蘭薪桂茶譜蘄州
團黃茶有一旗二槍之號言一葉二芽也晉陶潛傳嘗
言夏月虛閑高臥北窓之下清風颯至自謂羲皇上人
劉伶酒德頌奮髯箕踞枕麴藉糟無思慮其樂陶陶

余自城中還道中雲氣自山中來如羣馬奔突
以手掇開籠收其中歸家雲盈籠開而放之作

攬雲篇

物役會有時星言從高駕道逢南山雲歛吸如雷過竟

誰使令之哀哀從空下龍移相排拶

子達切

鳳舞或頽亞

散為東郊霧凍作枯樹稼或飛入吾車偪仄入肘膝搏
取置筥中提攜反茅舍開緘乃放之掣去仍變化雲兮
汝歸山無使達官怕

詩國風星言夙駕祝于桑田禮記天降時雨山川出雲
釋名雲猶云云衆盛意也韓愈雪詩崩騰相排拶龍鳳
交橫飛注排拶密拶也後漢書河南張楷字公超能作
五里霧時闕西人裴優亦能作三里霧謝氏詩源更羸
之妻能作鎖雲囊佩之陟高山有雲處雲氣入其中歸
家啟視雲白如綿自囊而出更羸善射每言能仰射入
雲中其妻不信因以一囊繫箭頭令射之及墜驤之果
有白雲在內因名箭曰鎖雲故子美詩云翻身向天仰

射雲是也詩意大槩本此唐諺語木若椽連官怕韻注
木椽一曰木介亦曰樹椽春秋雨木冰即此師古注曰
氣著樹木結為冰也杜詩有逼仄行

遊山呈通判承議寫寄參寥師

煌煌世胄餘夫子非碌碌由來有詩書所以能絕俗得
官本河朔仄期未易促扁舟下南來逸駕追鳴鶴遇勝
即倘佯風餐兼露宿嗟予偶傾蓋一笑外羈束仗策每
過從相攜訪山谷東風披鮮雲繡錯出林麓松門有時
盡幽景無斷續崖轉聞鐘聲林疎見華屋銜山餘落景

歸迹猶躑躅誰云鄴下歡往事不可復吾曹二三子取
樂亦云足願公寄新詩一一能見錄船頭行北歸囊橐
有美玉塵埃京洛人亦興洗心目

史記平原君傳公等錄錄所謂因人成事者也魏其武
安侯傳太后怒曰此時帝在即錄錄與錄錄全左傳齊
侯使連稱管至父戌葵丘瓜時而往曰及瓜而代期成
公問不至家語孔子之鄭遭程子於塗傾蓋而語終日
甚相親顧謂子路曰取束帛以贈先生文選靈運擬魏
太子鄴中詩序云建安末予時在鄴宮朝遊夕讌究懷
愉之極天下良辰美景賞心樂事四者
難并今昆弟友朋二三諸彦共盡之矣

和郭功父韻送芝道人遊隱靜

觀音妙智力應感隨緣度
芝師訪東坡寧辭萬里步道
義偶相契十年同去住行窮半世間
又欲浮盃渡我願
焚囊鉢不作陳俗具會取卻歸時只是而今路

楞嚴經得大自在力無畏施衆生妙音觀世音梵音海
潮音救世悲安寧出世獲常住高僧傳晉杯渡者不知
其姓名常乘大杯渡河因名焉許渾送僧詩杯浮野渡
魚龍遠錫響空山虎豹驚傳燈錄守清禪師有僧問如
何是和尚家風曰一瓶
魚一鉢到處是生涯

次韻魯直戲贈

昨夜試微涼汗衾初退紅
我願隨秋風隨身入房櫳
君

王不好事只作好驚鴻細看卷蠶尾我家真栗蓬

楊妃外傳楊貴妃每夏月常衣輕絹汗出紅膩而多香拭於巾帕其色桃紅洛神賦翩若驚鴻矯若遊龍詩小雅彼君子女卷髮如蠶注蠶螫蟲尾未捷然似髮之曲上者又國風昔如飛蓬栗蓬未詳禪宗有栗棘蓬語按之詩意不合宋玉登徒子好色賦其妻蓬頭攀耳齟脣歷齒云云栗蓬疑當作歷蓬

寄傲軒

歸去來辭倚南牕以寄傲

先生英妙年一掃千兔禿仕進固有餘不肖踐場屋通
關何所傲傲名非傲俗安知軒冕中享榮不償辱豈無
自安計得失猶轉轂先生獨揚揚憂患莫能瀆得如虎

挾乙失若龜藏六茅簷聊寄寓俛仰亦自足東坡無邊
春方寸盡藏畜醉哦傍若無獨有一樽醪牀頭車馬道
殘月挂疎木朝客紛擾時先生睡方熟

選賦終童山東之英妙杜甫詩詞源倒流三峽水筆陣
獨掃千人軍李白詩筆鋒殺盡中山兔酉陽雜俎虎威
如乙字長寸許在腋兩旁皮內尾端亦有之佩之臨官
則能威衆離阿含經有龜被野干所包藏六而不出野
干怒而捨去佛告諸比丘當如龜藏六根魔不得便
又野干獸名干音犴范石湖詩六用都藏縮似龜

御史臺榆槐竹栢四首

榆

我行汴堤上，厭見榆陰綠。千株不盈畝，斬伐同一束。及
居幽囚中，亦復見此木。蠹皮溜秋雨，病葉埋牆曲。誰言
霜雪苦，生意殊未足。坐待春風至，飛英覆空屋。

詩國風隰有榆爾雅榆白粉也管子五沃之上其榆條
長淮南子八月榆孺令人不飢春秋元命苞三月榆莢
落

槐

憶我初來時，草木向衰歇。高槐雖經秋，晚蟬猶抱葉。淹
留未云幾，離離見疎筴。栖鴉寒不去，哀叫飢啄雪。破巢

帶空枝疎影挂殘月豈無兩翅羽伴我此愁絕

周禮烜氏掌火冬取槐檀之火淮南子槐之生也入季春五日而兔目十日而鼠耳更旬而始規後漢書破巢之下寧有完卵

竹

今日南風來吹亂庭前竹低昂中音會甲刃紛相觸蕭然風雪意可折不可辱風霽竹已一作亦回猗猗散青玉

故山今何有秋雨荒籬竹此君知健否歸掃南軒綠一作

三徑綠

莊子養生主合於桑林之舞乃中經首之會詩國風綠
竹猗猗元稹竹詩一一青琅玕唐人郊居詩門外晚晴
秋色老萬條寒玉一溪烟晉書王徽之字子猷
嘗暫寄人空宅便命種竹曰何可一日無此君

柏

故園多珍木翠柏如蒲葦幽囚無與樂百日看不已時

來拾流膠

一作肪

未忍踐落子當年誰所種少長與我齒

仰視蒼蒼翰所閱固多矣應見李將軍膽落溫御史

春秋運斗樞玉衡星精散為栢李德裕平泉花木記有
珠子栢實如珠子生葉又有鴈翅檜葉婆娑如鴈翅也
漢書平恩侯許伯入第蓋寬饒仰屋視而歎曰富貴無
常忽則易人此如傳舍所閱多矣唐書敬宗初立夏綏

節度使李祐進馬百五十匹侍御史溫造彈祐違敕進
奉請論如法詔釋之卻其所進祐謂人曰吾夜半入蔡
州城取吳元濟未嘗心動今日膽落於溫御史矣柔道
茂傳茂居有二栢甚盛茂曰人居木盛則土衰土衰則
人病乃以鐵數十斤自理其下曰後有發
者死太和中溫造居之發藏鐵而造死

問淵明

公自注或曰東坡此詩與淵明反此非
知言也蓋亦相引以造意言者未始相
非也元祐五
年十月日

予知神非形何復異人天豈惟三才中所在靡不然我
引而高之則為星斗懸我散而卑之寧非山與川三皇
雖云沒至今在我前八百要有終彭祖非永年皇皇謀

一醉發此露糧妍有酒不辭醉無酒斯飲泉立善求我
譽飢人食饒涎委運憂傷生憂一作運去生亦還縱浪大
化中正為化所纏應盡便須盡寧復事此言

朱亥墓

公自注俗謂屠兒墓

昔日朱公子雄豪不可追今來遊故國大塚屈稱兒平
日輕公相千金棄若遺梁人不好事名字寄當時魯史
盜齊豹求名誰復知慎無怨世俗猶不遭仲尼

史記信陵君傳公子請朱亥朱亥笑曰臣乃市井鼓刀屠者而公子親教存之所以不報謝者以為小禮無所

用今公子有急此乃臣效命之秋也遂與公子俱至晉
鄙軍晉鄙合符疑之欲無聽朱亥袖四十斤鐵椎椎殺
晉鄙春秋經昭二十年秋盜殺衛侯之兄縶穀梁傳盜
賤也其曰凡母兄也目衛侯衛侯累也春秋經昭三十
一年冬黑肱以濫來奔左傳賤而書名重地也或求名
而不得或欲蓋而名彰是以春秋書齊豹曰盜三叛人
名以懲
不義

嚴顏碑

先主反劉璋兵意頗不義孔明古豪傑何乃為此事劉
璋固庸主誰為死不二嚴子獨何賢談笑傲碓几國亡
君已執嗟子死誰為何人刻山石使我空涕淚吁嗟斷

頭將千古為病悖

蜀書張飛傳先主入益州還攻劉璋飛與諸葛亮等沂
流而上分定郡縣至江州破璋將巴郡太守嚴顏生獲
之飛呵顏曰大軍至何以不降顏答曰卿等無狀侵奪
我州我州但有斷頭將軍無降將軍也飛怒令左右牽
去斫頭顏色不變曰斫頭便斫頭何為怒也飛壯而釋
之引為賓客漢田延年傳大將軍曰誠然實勇士也發
大議時震動朝廷光因舉手自撫心曰
使我至今病悖師古注悖心動也音揆

峴山

在襄陽
府城南

遠客來自南游塵昏峴首過關無百步曠蕩吞楚藪登
高忽惆悵千載意有偶所憂誰復知嗟我生苦後團團

山上檜歲歲閱榆柳大材固已殊安得同永久可憐山
前客倏忽星過雷賢愚未及分來者當自剖

晉羊祜傳祜樂山水每風景佳必造峴山嘗慨然歎息
顧謂從事鄒湛等曰自有宇宙便有此山由來賢達勝
上登此遠望如我與卿者多矣皆湮滅無聞使人悲傷
如百歲後有知魂魄猶應登此也湛曰公德冠四海道
嗣前哲令聞令望必與此山俱傳至若湛輩乃當如公
言耳及祜卒襄陽百姓於峴山祜平生游憩之所建碑
立廟歲時饗祭焉望其碑者莫
不流涕杜預因名為墮淚碑

驪山

君門如天深幾重君王如帝坐法宮人生難處是安穩

何為來此驪山中
複道凌雲接金闕
樓觀隱烟橫翠空
林深霧暗迷八駿
朝東暮西勞六龍
六龍西幸峨眉棧
悲風便入華清院
霓裳蕭散羽衣空
麋鹿來游猿鶴怨
我上朝元春半老
滿地落花無人掃
羯鼓樓高挂夕陽
長生殿古生青草
可憐吳楚兩醯雞
築臺未就已堪悲
長楊五柞漢幸免
江都樓成隋自迷
由來留連多喪國
晏安酖毒因奢惑
三風十愆古所戒
不必驪山可亡國

一統志驪山在臨潼左曰東繡嶺右曰西繡嶺下有溫泉其清澈底不火而熱初學記閭闔天門也角亦天門

也楚辭天之門兮九重晉志心三星天王正位也中星
曰明堂天子位為大辰主天下之賞罰故天子所居曰
法宮戰國策蘇秦曰謁者如鬼主人難得見如天帝明
皇雜錄天寶六年更溫泉宮曰華清宮治井為池環山
列宮室李白詩六龍西幸萬人懼蛾眉山名在蜀詳見
下卷望湖亭詩注杜牧華清宮詩行雲不下朝元閣一
曲淋鈴淚萬行劉禹錫詩開元天子萬事足惟惜當時
光景促三鄉驛上望仙山歸作霓裳羽衣曲史記淮南
傳伍被曰臣聞子胥諫吳王吳王不用乃曰臣今見麋
鹿游姑蘇之臺也今臣亦見宮中生荆棘露沾衣也南
京羯鼓錄明皇嘗遇二月初宿雨始晴景色明媚小殿
亭內柳杏將吐遣高力士取羯鼓上臨軒縱擊一曲名
春光好回顧柳杏皆折白樂天長恨歌七月七日長生
殿夜半無人私語時吳地記吳王闔閭十一年起臺於
姑蘇山因山為名左傳楚靈王為章華之臺與伍舉登
焉曰臺美矣夫醜難壘中小蟲見莊子三輔黃圖五柞

宮在藍屋漢武帝建有五柞樹可蔭數畝長楊宮在藍屋本舊秦宮漢修飾以備行幸有垂楊以名通鑑隋煬帝游江都浙人項昇進新宮圖營建既成幸之曰使真仙遊此亦當自速因名速樓左傳晏安酖毒不可懷也尚書伊訓惟茲三風十愆卿士有一予身家必喪邦君有一予身國必亡

和子由除日見寄

薄官驅我西遠別不容惜方愁後會遠未遐憂歲夕強歡雖有酒冷酌不成席秦烹惟羊羹隴饌有熊腊念為兒童歲屈指已成昔往事今何追忽若箭已釋感時嗟事變所得不償失府卒來驅讎矍鑠驚遠客愁來豈有

魔煩汝為攘磔寒梅與凍杏嫩萼初似麦攀條為惆悵
玉藥何時拆不憂春艷晚行見棄夏覈人生行樂耳安
用聲名藉胡為獨多感不見膏自炙詩來苦相寬子意
遠可射依依見其面疑子在咫尺兄今雖小官幸忝佐
方伯北池近所鑿中有汧水碧臨池飲美酒尚可消永
日但恐詩力弱關健未免馘詩成十日到誰謂千里隔
一月寄一篇憂愁何足擲

陶詩飢來驅我去淮南子熊當心有白脂如玉味甚美
俗呼熊白國語單襄公曰高位實疾債厚味實腊毒周

禮腊人掌乾肉又脯腊註腊小物全乾者周禮方相氏黃金四目玄衣朱裳執戈揚盾率百隸時難以索室驅疫難通作儺後漢禮儀志季冬先臘一日大儺逐疫選門子弟十歲以上十二歲以下百二十人為儺子皆赤幘皂衣執大鼗鼓以逐惡鬼於禁中月令季冬之月天子居玄堂右个命有司大儺旁磔出土牛以送寒氣又九門磔攘以畢春氣漢楊惲傳人生行樂耳須富貴何時漢兩龔傳龔勝不食死有老父來弔哭甚哀既而曰嗟乎龔以香自燒膏以明自銷龔生竟天天年非吾徒也遂超而出莫知其誰詩國風且以喜樂且以永日魯須臾在泮獻賦記釋奠於學以訊讖告莊子搞項黃讖一作賦或云載耳從賦獻首從讖謝莊月賦隔千里兮共明月史記屈原憂愁幽思而作離騷

夢雪

殘杯失春溫破被生夜悄開門千山白俯仰同一照雖
時出圭角固已絕瑕竅兒童勿驚怪調汝得一笑

送呂行甫司門倅河陽

結交不在久傾蓋如平生識子今幾日送別亦有情子
生公相家高義久崢嶸天才既超詣世故亦屢更譬如
追風驥豈免羈與纓念我山中人久與麋鹿并誤出挂
世網舉動俗所驚歸田雖未果已覺去就輕河陽豈云
遠出處恐異程便當從此別有酒無徒傾

觀子玉郎中草聖

柳侯運筆如雷閃子雲寒悴羊欣儉百斛明珠便可扛
此書非我誰能雙

韋續書訣墨薺唐太宗論蕭子雲書行行如縈春蚓字
字如縮秋蛇故曰寒悴法書苑梁武帝評羊欣書如大
家婢為夫人雖加位遇
而舉止羞澀故曰儉也

歌辭

竹枝歌

并序

竹枝歌本楚聲幽怨惻怛若有所深悲者豈亦往

者之所見有足怨者歟夫傷二妃而哀屈原思懷
王而憐項羽此亦楚人之意相傳而然者且其山
川風俗鄙野慙苦之態固已見於前人之作與今
子由之詩故特緣楚人疇昔之意為一篇九章以
補其所未道者

蒼梧山高湘水深中原北望度千岑帝子南遊飄不返
惟有蒼蒼楓桂林楓葉蕭蕭桂葉碧萬里遠來超莫及
乘龍上天去無蹤草木無情空寄泣水濱擊鼓何喧闐

相將扣水求屈原屈原已死今千載滿船哀唱似當年
海濱長鯨徑千尺食人為糧安可入招君不歸海水深
海魚豈解哀忠直吁嗟忠直死無人可惜懷王西入秦
秦關已閉無歸日章華不復見車輪君王去時簫鼓咽
父老送君車軸折千里逃歸迷故鄉南公哀痛彈長鋏
三戶亡秦信不虛一朝兵起盡譴呼當時項羽年最少
提劍本是耕田夫橫行天下竟何事棄馬烏江馬垂涕
項王已死無故人首入漢庭身委地富貴榮華豈足多

至今惟有塚嗟峨故國淒涼人事改楚鄉千古為悲歌

一統志禹貢荊州之域天文牛女分野周為百粵地秦
屬桂林漢曰蒼梧地總百粵山連五嶺柳開記桂林全
州分水嶺下即湘離二水東自海隅至此分南北而離
也北為湘水南為離水竹書舜南巡不返史記舜巡狩
崩於蒼梧之野葬於九疑漢郊祀志黃帝采首山銅鑄
鼎於荆山下鼎既成有龍垂胡顓下迎黃帝黃帝上騎
羣臣後宮從上龍七十餘人龍迺去餘小臣不得上悲
持龍顓墜墜黃帝之弓黃帝既上天乃抱其弓與龍顓
號博物志舜南巡不返二女追之不及至洞庭之山以
淚揮竹竹盡斑妃死為湘水神故曰湘妃竹續齊諧記
五月五日楚人楝葉裹糗投汨羅江祭屈原注見前晉
夏統傳頌小海之唱謂子胥屈平立吾左右矣崔豹古
今注鯨海魚也大者長千里小者數丈一生數萬子異
物志鯨鯢長百丈大亦稱之雄曰鯨雌曰鯢史記屈原

傳時秦昭王與楚婚欲與懷王會懷王欲行屈平曰秦虎狼之國不可信不如無行懷王推子蘭勸王行入武關秦伏兵絕其後因留懷王以求割地懷王怒不聽亡走趙趙不內復之秦竟死於秦而歸葬漢書臨江王傳既上車軸折車廢江陵父老流涕竊言曰吾王不反矣項羽本紀范增說項梁曰齊滅六國楚最無罪自懷王入秦不反楚也彈缺用馮驩事已見又羽本紀項籍者字羽秦必楚也彈缺用馮驩事已見又羽本紀項籍者字羽初起時年二十四又項王謂烏江亭長曰吾知公長者吾騎此馬五歲所當無敵嘗一日行千里不忍殺之以賜公顧見漢騎司馬呂馬童曰若非吾故人乎吾聞漢購我頭千金邑萬戶吾為若德乃自刎而死又夜聞四面皆楚歌又項王乃悲歌忼慨

輓轡歌

新繫青絲百尺繩。心在君家轆轤上。我心皎潔君不知。
轆轤一轉一惆悵。何處春風吹曉幕。江南綠水通珠閣。
美人二八顏如花。泣向花前畏花落。臨春風聽春鳥別。
時多見時少。愁人一夜不得眠。瑤井玉繩相對曉。

古賦輻轤不絕注環轉也人轆轤井上汲水木一作轆
轤魏志京城內有園患無水傳元先生乃作翻車令童
轉之水自復更入其功百倍白居易詩蕭相厥初謁名
平中庭百拜百不辱召平後來謁蕭相故侯一拜一惆
悵郭璞井賦爾乃冠玉檻甃鱗錯鼓轆轤彈勁索飛輕
席之纈紛手爭驚而互搦長累逶蛇以曾縈芳瑤壘龍
騰而洒激禮斗威儀玉衡北兩星為玉繩謝朓詩金波
麗鵲玉繩低建章再見梁謝舉凌雲臺詩勢高凌玉

井臨迴度金波注玉井星名按此則瑤井玉繩
皆指星言故曰相對曉公詩精妙典博如此

辨道歌

北方正氣名祛邪東郊西應歸中華離南為室坎為家
先凝白雪生黃芽黃河流駕紫河車水精池產紅蓮花
赤龍騰霄驚盤蛇姹女含笑嬰兒呀十二樓瞰靈泉霍
華池玉液陰交加子馳午前無停差三田聚寶真生涯
龜精鳳髓填谿訝天地駭有鬼神嗟一丹休別內外砂
長修久餌須叔遐腸中澄結無餘相俗骨變換顏如葩

哀哉世人爭齒牙指偽為真正為哇輕肥甘美形驕奢
譎詭詐妄言矜誇遊魚在網兔在罝一氣頓盡猶嘔啞
餘生所託誠棲槎九原枯髀如亂麻胡不割衆如鑊鉀
空與利名交撐拏胡不讓□如文騮可惜貪愛相漫塗
真心道意非不嘉餐金聞活非虛譁何須橫議相疵瑕
衆口並發鳴羣鴉安知聚散同魚蝦自纏如繭居如蝸
日懷嗔喜甘寵斂其去死地猶獵獬吾恨爾見有所遮
海波或至驚井蛙烏輪即晚蟾影斜吾時俱覩超雲霞

史記司馬相如傳呼吸沆瀣兮餐朝霞師古注沆瀣北方夜半氣也揚雄曰或玄而萌或黃而芽陰真君金液丹訣北方正氣為河車東方甲乙成丹砂兩情合養為一體朱雀調運生金花真訣龍從火裏出虎向水中生注龍本坎水而出於火虎本離火而出於水是乃水火之相生也志林人生死自坎離交則生分則死離為心坎為腎龍者汞也精也血也出於腎肝藏之坎之物也虎者鉛也氣也力也出於心肺藏之離之物也道書蓬萊修煉法河車是水朱雀是火取水一斗鑪中以火炙之百沸致聖石九兩其中初成姤女次謂之王液後成紫色謂之河車白色曰白河車青色曰青河車赤色曰赤河車赤名黃芽參同契河上姤女得火則飛孫思邈詩取金之精合石之液列為夫婦結為魂魄一體混沌兩精感激河車覆載鼎候無忒洪爐列火烘鍛翕赫姤女氣索嬰兒聲寂紫色內達赤芒外射骨髓金植顏駐玉澤黃庭內景經琴心三疊舞胎仙注射琴和也疊積也

和積三丹田如一則如胎息之仙也太清煉靈丹經丹砂外包八石內含金精晉書許邁字叔遐服氣一氣千餘息仙經道家用金色藥石於鼎以水火煉之成丹為外丹口吐濁氣曰吐故鼻納清氣曰納新為內丹莊子天運篇祖黎摘抽其味相反而皆可於口又兵莫惜於志鏖錡為下真詰仰咽金漿控景登空左傳予取予求不汝疵瑕也懷沙賦鳳凰在茲兮難雄翔舞說文瑕壯來也左傳既定爾婁豬盍歸吾父瑕莊子塤井之龜注見前五經通義月中有兔與蟾何月陰也蟾蜍陽也而與兔並明陰繫於陽也

陳守道

一氣混淪生復生有形有心即有情共見利欲飲食事各有小牙頭角爭爭時怒發霹靂火險處直在嵌巖坑

人偽相加有餘怨天真喪盡無純誠徒自取先用極力
誰知所得時空名少為處士松柏寒蓬萊真人冰玉清
山是心兮海為腹陽為神兮陰為精渴飲靈泉水飢食
玉樹枝白虎化坎青龍離鎖禁姪女關嬰兒樓臺十二
紅玻璃木公金母相東西純鉛真汞星光輝烏升兔降
無年期停顏卻老只如此哀哉世人迷不迷

越絕書道生氣氣生天地天地生萬物莊子曰德充符惠
子曰人而無情何以謂之人莊子曰道與之貌天與之
形惡得不謂之人惠子曰既謂之人惡得無情春秋繁
露王者言不從則金不從車而秋多霹靂霹靂金氣也

其音商也穀梁傳陰陽相薄感而為雷激而為霆廣記
木公生於碧海之上以主陽和之炁號東王公又以西
華至妙之炁化而生金母西王母傳漢初
小兒歌曰著青席入天門揖金母拜木公

老人行

有一老翁老無齒處處無人問年紀白髮如絲向下垂
一雙眸子碧如水不裏頭又無履相識雖多少知己問
翁畢竟何所止笑言只在紅塵裏秋風獵獵行雲飛老
人此意無人會目注雲歸心自知黃口小兒莫相笑老
人舊日曾年少浪迹常如不繫舟地角天涯知自跳亦

曾樂半夜傳籌醉朱閣美人如花弄絃索只恨尊前明月落亦曾憂羈旅他鄉迫暮秋故國日邊無信息斷鴻空逐水長流或安貧或安富或爵通侯封萬戶一任秋霜換鬢毛本來面目長如故水有蘋兮山有芝人意雖存事已非有時卻憶經遊處都似茫茫春夢歸邇來尤解安貧賤不為公卿強陪面皎如明月在秋潭動著依前還不見還不見可奈何空使遠人增眷戀但祇從他隨物轉青樓黃閣長相見若相見莫慙懃卻是翁家舊

主人

孔子猗蘭操年紀述邁一身將老國語注十二年歲星一周為一紀韓詩一奴長鬚不裹頭一婢赤腳老無齒家語所得皆黃口小雀史記是口尚乳臭莊子列禦寇汎若不繫之舟韓子祭十二即文一在天之涯一在地之角漢紀漢世祖於樓上施青漆謂之青樓杜牧之詩贏得青樓薄倖名此則指娼家青樓也宋志三公黃閣前史無其義禮記士卑與天子同公侯大夫則異鄭玄注士賤與君同不嫌也夫朱門洞開當陽之正色也三公之與天子禮秩相亞故黃其間以示謙從舊制也

襄陽樂府三篇

野鷹來

水經注污水南有層臺號曰景升臺蓋荊州牧劉表所築表好鷹嘗登此

臺歌野
鷹來曲

野鷹來萬山下荒山無食鷹苦飢飛來為爾繫綵絲北
原有兔老且白年年養子秋食菽我欲擊之不可得年
深兔老鷹力弱野鷹來城東有臺高崔嵬臺中公子著
皮袖東望萬里心悠哉鷹何在嗟爾公子歸無勞使鷹
可呼亦凡曹天陰月黑狐夜嗥

禮記立秋之日鷹隼乃擊廣志有雉鷹有兔鷹圖經萬
山在襄陽城西相傳鄭交甫所見游女居此山之下瑞
應圖王者恩加者老則白兔見抱朴子兔壽千歲五百
歲則色白晉書權翼諫秦王堅曰慕容垂勇略過人其

心豈止作冠軍而已譬如養鷹飢則附人飽則高
飛每聞風飈之聲嘗有凌霄之志正宜謹其條籠

上堵吟

水經注堵陽縣有堵水旁有白馬塞
益達為新城守登之而歎遂為上堵

吟音韻哀切今
水次尚歌之

臺上有客吟秋風悲聲蕭散飄入宮臺邊遊女來竊聽
欲學聲同意不同君悲竟何事千里金城兩椎子白馬
為塞鳳為關山川無人空且閑我悲亦何苦江水冬更
深鰕魚冷難捕悠悠江上聽歌人不知我意徒悲辛

襄陽記鳳林關在峴山衡州金城山記武岡金城山道
書第六十八福地石真人修煉於此題曰仙都白馬關

在衡州
城東北

襄陽樂

南史劉道產為襄陽太守善於臨職
蠻服歸順百姓樂業由此有襄陽樂

歌自道
產始

使君未來襄陽愁提戈入市裏
羶裘自從羶裘南渡沔
襄陽無事多春遊
襄陽春遊樂何許
峴山之陽漢江浦
使君朱旆來翻翻
人道使君似羊杜
道邊逢人問洛陽
中原苦戰春田荒
北人聞道襄陽樂
目送飛鴻應斷腸

漢司馬遷傳羶裘之君長咸震怖峴山注見前晉書羊
祜字叔子泰山南城人也杜預字元凱京兆杜陵人也

顧愷之傳愷之每重嵇康四言詩因為
之圖恒云手揮五絃易目送歸鴻雞

仙都山鹿

老泉詩序云至豐都縣將遊仙都觀見知縣李長
官云固知君之將至也此山有鹿甚老而猛獸獵
人終莫能害將有客來遊鹿輒夜鳴故常以此候
之而未嘗失余聞而異之乃為作詩

東坡同賦按
此序當細書

今依
原本

日月何促促塵世若局束仙子去無蹤故山遺白鹿仙

人已去鹿無家孤棲悵望層城霞至今聞有遊洞客夜
來江市叫平沙長松千樹風蕭瑟仙宮去人無咫尺夜
鳴白鹿安在哉滿山秋草無行迹

春秋運斗樞瑤光星散為鹿迷異記鹿千歲而蒼又五
百年而白虞世南白鹿賦宴嘉賓於雅什寓仙客於宜
春明皇別錄芙蓉園得一白鹿山人王旻曰此漢時鹿
也果於角際雪毛中得一銅牌刻曰宜春苑中白鹿上
目之曰仙客命園人善畜之又玄都觀老鹿將有客來
輒夜鳴道士每候之無失淮南子掘崑崙墟以下地中
有層城九重孫綽遊天台山賦仍羽人於丹丘尋不死
之福庭荀台嶺之可攀亦何羨於層城又赤城霞起而
標建

白鶴吟留鍾山覺海

白鶴聲可憐紅鶴聲可惡白鶴招不來紅鶴揮不去長
松受穢死乃以紅鶴故北山道人曰美者自美吾何為
而喜惡者自惡吾何為而怒去自去耳吾何駛而追來
自來耳吾何妨而拒吾豈厭喧而求靜吾豈好丹而非
素汝謂松死吾無依焉吾方捨陰而坐露

相鶴經鶴者陽鳥也而遊於陰百六十年大毛落茸毛
生潔白如雪漢汲黯傳守城深堅招之不來麾之不去
莊子山木篇陽子之宋宿於逆旅逆旅人有妾二人其
一人美其一人惡惡者貴而美者賤陽子問其故逆旅

小子對曰其美者自美吾不知其美也其惡者自惡吾不知其惡也錄異記魏焦先字孝然結草廬於河間號蝸牛廬呻吟其中後堊火燒之乃露袒寢雪中

次韻張甥崇美述志

名宗與

仲子甘心織屨避萬鍾淵明不甯折腰為五斗一年鴻鴈識來往終日沐猴誰去取知甥詩意慕兩君讀書要在存心久平生所談性命與長棄不憂金石朽我今已習鷺子定猶復晨朝怖頭走剗心先擬射殺名不作羊鄒悲峴首雲梯雨矢集無方我已中灰同墨守恐甥自

是禹門鱗未可潛逃入吾數琢磨晚覺孟光賢畏我放
言時被肘甥能鉏我青門瓜正午時來休老手

高士傳陳仲字子終齊人適楚王欲以為相妻曰子織
履以為食怙淡而無為樂在其中矣乃謝使者晉陶潛
傳潛歎曰吾不能為五斗米折腰奉奉事鄉里小人史
記說者曰人言楚人沐猴而冠耳果然項王聞之烹說
者心經注舍利子即舍利佛此云驚子於小乘十大弟
子中智慧第一已得空定楞嚴經佛告富樓那汝豈不
聞室羅城中演若達多忽於晨朝以鏡照面愛鏡中頭
眉目可見瞋責已頭不見面目以為魑魅無狀狂走晉
羊祜登峴首語郗湛注見前墨子公輸般為雲梯之械
將攻宋墨子見之乃解帶為城以堞為械九設攻城之
機墨子九拒之公輸般攻城盡而墨子守有餘卒氏三
秦記河津一名龍門大魚集門下數千不得上上者為

龍不上者魚故云曝顯龍門晉載記祖約敗降於石勒
勒使讓之曰卿逆極勢窮方來歸命吾朝豈遁逃之數
也說苑魏桓子肘韓康子康子履魏桓子躡其踵肘足
接於車上而智氏分矣青門小用東陵侯召平事已見
晉載記石勒與李陽鄰居歲常爭麻池迭相毆擊至
是引陽臂笑曰孤往日厭卿老拳卿亦飽孤毒手

補和陶詩二首

和東方有一士

餅居本近危甌墜知不完夢求亡楚弓笑解適越冠忽
然返自照識我本來顏歸路在腳底穀潼失重關屢從
淵明遊雲山出毫端借君無弦物寓我非指彈豈惟舞


獨鶴便可躡飛鸞還將嶺茅瘴一洗月闕寒

公自注此東方一士

正淵明也不知從之游者誰乎若了得此一段我即淵明淵明即我也

和劉柴桑

萬劫互起滅百年一跼蹐漂流四十年今乃言卜居且
喜天壤間一席亦吾廬稍理蘭桂叢盡平狐兔墟黃櫨
出舊枿紫茗抽新畝我本蚤衰人不謂老更劬邦君助
畚鍤鄰里通有無竹屋從低深山牕自明踈一飽便終
日高眠忘百須自笑四壁空無妻老相如



蘇詩續補遺卷上